

REMBERTI DODONAEI
DE
FRVMENTIS, LEGVMINIBVS,
PALVSTRIBVS, ET AQVATILIBVS,
AC EO PERTINENTIBVS HERBIS,
STIRPIVM HISTORIAE
PEMPTAS QVARTA.

DE FRVMENTIS
LIBER PRIMVS.

PRÆFATIO.



ACTENVS stirpium herbarumq; prosecuti sumus historias ad mediam materiam facientes: nunc vero ad eas properamus, quæ corpus alunt, atque ex numero sunt alimentorum: Fruges videlicet & Olera.

Frugum autem nomine continentur Frumenta & Legumina, que Latinus Cerealia semina, Græcis oīnēz rōz dñūnēz cōrōmōz appellantur, quarum historias modo prosequi huius est instituti, tum & corum quæ eō pertinere, necnon stirpium earum, quæ ipsis coniungi posse videbantur.

Pertinent verò ad frugum harum historiam, omnia ex frumentis factitia, ut far, chondrus, alica, tragus, amyllum, p̄tisana, polenta, maza, b̄vn, zythum, & si quæ sunt alia eiusdemodi.

Faciunt eodem & alia multa semina à Theophrasto lib. octauo inter fruges, & tertio quidem loco, reposita, quæ & à Galeno primo De facultatibus alimentorum libro, inter id dñūmōz sine edulia enumerantur, cuiusmodi sunt Sesami, Erysimi, Lini, Cannabis, Fænograci, & aliorum similium, veluti & Fegopyri, quibus vel prior etas in cibis usus est, vel nostra hæc uitit.

Iam & frugum vitia, tam ex ipsis frugibus degenerantibus, & per celi aut soli inclem tam in peius mutatis enata, quam etiam inter eas excentia ipsis molesta, frugibus etiam opportune succedunt: commode saltem omitti, aut ab ijs se Jungi non possunt. Cum quibus non inconcinnè, nec prater institutum, aruorum quoque ac pratorum pestes ac vitia, in hanc operis partem admittuntur.

Additæ sunt palustrium multarum & aquatilium herbarum descriptiones, quia nulli nostri operis parti commodiùs, quam huic, coniungantur. Palustrium etenim plurime iumentorum aliorumq; pabula quadrupedum sunt, veluti & multarum frugum vitia, & ipsæ quoque non raro fruges. Aquatiles autem paucas quidem, aut nullas, animalia hæc pascuntur, sed natum locorum vicinitas ac affinitas, eas in palustrium consortium traxit.

Descriptæ autem sunt palustres non omnes, sed quæ huic parti congruere magis uisa sunt; non paucas siquidem de industria & data etiam opera omisimus, quæ videlicet aptius aliis locis describi contigit. Sunt verò & inter palustres minimè tales, veluti trifolia quædam, quæ vel propter nominis communionē, vel terna cohæretia folia, ab aliis palustribus trifoliis diuelli non poterant.


Et proprie has maximè rationes horum omnium historias in unam hanc, ut diximus, partem contraximus. A frumentis autem exordientes, de Tritico primū agemus, ut & priore loco describatur, quod omnibus frumentis etiam prefertur.

DE

DE TRITICO.

CAPUT PRIMUM.

Triticum.



TRITICVM folio exit Secalis minore: culmis affurgit plurimis, geniculatis, hordei altioribus; quorum tertio aut quarto articulo spica eminet, ut plurimum mutica, interdum verò & aristis nonnullis brevibus cincta: grana profert colore flava; quæ è glumis ac folliculis facile excidunt, ac exiguo negotio in area exteruntur: radicibus firmatur multis tenuibus.

Prouenit in omnibus ferè habitat ac culti orbis regionibus, à quibus & complura eius notantur genera, cognomina ab ipsis natalibus fortia; quæ colore, magnitudine, specie, & proprietate inter se differunt: testis Theophrastus.

Lætum autem pingueque solum Triticum postulat, idque magis apricum & siccum, quam riguum. In sicco enim, ut Columella refert, melius coalescit: in humido verò ac viginoso degenerat; & post tertiam sationem in Siliginem, hoc est, lœuius & candidius Triticum conuertitur: quæ tamen & rursus in Robum, id est, præstantius Triticum biennio transit, si in conueniens solum translata, grauissima eius grana serantur: auctor Plinius.

Seritur frequentius Autumno, interdum Vere: Autumno satum per hiemem in herba est, & pluribus culmis attollitur, & frequentioribus radicibus firmatur: æstiu mensibus vtrumque ad maturitatem peruenit.

Appellant Germani Weizen / Belgæ Tertue / Itali Grano, Hispani Trigo, Galli Bled ou Four-

ment, Angli Weet: Græcis πυργός dicitur, Latinis Triticum. Significat verò Triticum generaliter quidem omne frumentum, quod ex spicis tritum ac trituratione repurgatum est: in quo significato Iurisconsultus nonnumquam hac voce vtitur: vt ff. De verb. oblig. propriè tamen idem cum eo, quod Græcis πυργός, est.

In Tritici verò genere, quod durum solidumque, & rutilo colore non modò extrinsecus splendet, verùm etiam in partes diuisum, euādem interius refert, Columellæ Robus appellatur. Pondere hoc (quo maximè omnis frumenti præstantia discernitur) & nitore præstat.

Aliud genus mollius, lœuius, interioreque medulla laxius ac candidum, (quale plerisque locis laudatissimum habetur) Siligo à veteribus Latinis appellatur. Hanc Plinius propter siligo. candorem, ac in mandendo suavitatem, commendat, & Tritici etiam delicias nuncupat. Siliginem (inquit) propriè dixerim Tritici delicias: candor est, sine virtute, & sine pondere, conueniens humidis tractibus, quales Italæ sunt & Gallæ Comatae: lib. xviii. cap. viii. Columella verò, eius quidem speciem in pane præcipuam concedit; sed tamen quia pondere inferior, Tritici vitium esse censet: Quod extrinsecus, inquit, albidum, intus verò conspicitur candidum, leue ac vanum intelligi debet; nec nos tamquam optabilis agricolis, fallat Siligo: nam Tritici hoc est vitium, & quamvis candore præstet, pondere tamen vincitur.

Quod Vere seritur, Galli, Ruellio auctore, Martium cognominant, Belgæ Sommerterwe.

Græcis Σιγνος πυργός, id est, Trimestre Triticum, & ὄνταριας: Latini Setarium vocant. Huius usus, Columella ait, agricolis gratissimus: ubi enim propter aquas aliāmve cauſam matrū fatio est omīsa, præsidium ab hoc petitur: Trimenon autem siue trimestre dicitur, quod tertio à satione mense, Italæ maturescat. A Tritico ac Silagine potissimum, (cui candore leuitateque simile est, eiusque idcirco genus quoddam) solo sationis tempore differt. Quod si enim maturius sereretur, commodius proueniret. neque enim ullum natura trimestre Triticum; quippe idem satum Autumno melius responderet: Columella.

Triticum autem, ut inquit Galenus, frequentissime ac summa cum utilitate ab hominibus usurpat. Inter ea plurimum habent alimenti, quæ densa sunt, totamque substantiam habent

habent adeò compactam, vt dentibus vix diuidi queant. Talia enim exigua mole, corpora plurimùm nutriunt; quæ verò ijs sunt contraria, quæque dentibus facile franguntur, fractaque rara & laxa apparent, magna mole exiguum reddunt alimentum.

Vt medicamentum verò foris impositum, primi est ordinis excalafacentium, non tamen nec reficcare, nec humectare manifeste potest. habet etiam quiddam lensoris obstruentisque naturæ.

Triticæ, Dioscorides ait, cruda in cibis teretes lumbriccs gignunt: canum morsibus profund mansa & imposta.

Farina cum Hyoscyami succo imponitur aduersus neruorum rheumatismos, item contra interaneorum inflationes: lentigines ex aceto mulso tollit. Setaniorum farina contra venenatos ictus cum aceto aut vino imposta prodest: eadem si decocta in glutini modum delingatur, cruentis excretionibus succurrat: contra tuſsim & exasperatas arterias, cum Mentha & butyro decocta efficax est.


Tritici gr̄us si ex aqua mulsa aut hydrelæo decoquatur, omnem discutit inflammationē.

Furfures autem in acri aceto decocti lepras remouent, & incipientibus omnibus inflammationibus commode imponuntur: cum Rutæ verò decocto cocti, turgentes mammas sedant, viperarum ictibus auxiliantur, & torminosis profund.

Siliginis grana, Plinius lib. xxii. combusta & trita in vino Amino, oculis illita, epiphoras sedant. Tritici verò combusta, ijs, quæ frigus vfferit, præsentaneo sunt remedio. Farina ex aceto cocta, neruorum contractionibus auxiliatur. Furfures tonsillis faucibusque gargarizatione profund.

De Tritico Typhino. C A P. I I.

Triticum Typhinum.



R E PERIT VR verò & aliud frumenti quoddam genus, grano & culmis Triticum referens, quod culmos quidem habet breuiores ac tenuiores; spicam verò aristis longis & duris Hordei similitudine munita; granum autem durum, densum, colore fuluum, Tritico minus, quodque facile è glumis suis exteritur.

Nascitur in quibusdam Hispaniæ, ac insularum Fortunatarum agris: Phalaridis enim semini, quod illinc aduechitur, permixtum reperitur: vnde collectum atque in hortis satum, ea qua depictum est forma prodit.

Suspiciari quis possit, semen hoc Typham esse, cuius Theophractus & Galenus meminerunt. Sed cùm Typha granum multiplici folliculo inclusum difficulter deglubatur, huius autem facile, Typha propriè esse non potest: licet tamen ex Typha natum, & degeneratum esse possit; nam quod ad reliquas notas attinet, ei simillimum est. Inter ea enim quæ Tritico ac Zea similia, leuisimū elt, tenui ac simplici culmo assurgit, vt de Typha Theophrastus scribit. Semen eius paruum quoque est & exile, densum item & coactum, atque colore quam Triticum magis ruffo, vt Galenus de Typha scriptum prodidit. Iam & spica aristas habet longas ac duras, quales Typha esse ex veterum plerique locis manifestum est.

Quæ omnia tam magnam frugis cum Typha similitudinem ostendunt, vt planè non aliud, quam ex Typha Triticum ac Typhinum

quoddam Triticum esse videatur. Nam & Typha, auctore Theophrasto, in Triticum transit, si pista ac purgata, seratur. Rationi autem consentaneum videtur, Triticum ex Typha natum similitudinis plurimum cum ea retinere, non secus ac Triticum ex Zea genitum, quod culmo spicaque Zeam refert.

Huic non admodum dissimile videtur, quod Hieronymus Tragus Wälsch Weizen / hoc est, Triticum Italicum aut Romanum cognominat: nam & huius spica aristas habet longas & asperas; est tamen culmis, spicis, atque granis maius, spicas etenim habet pleniores, rotundiores &c

*Triticum
Romanum*

dioresque quam Triticum, semen vero pulcherrimum atque Triticeo simile, ut Tragus refert.

Seritur frequentius in Alsacia, rarius in alijs Germaniae regionibus, idque locis potissimum montois, praesertim ubi apri fruges depascuntur, nam ab hoc uno fere abstinent, quod durioribus eius aristis offenduntur.

De pane ex Tritico. C A P . 1 1 1 .

CONFICITVR panis ex omni quidem frumento, sed ex Tritico longe praestantissimus. Veluti etenim Triticum reliquis omnibus frugibus praeferat, ita & ex Tritico panis reliquorum omnium frumentorum panificia antecellit.

Sunt huius panis aliquot genera, quae a Triticea farinæ partibus, primaria differentia nomina acceperunt.

Moliti liquidem Tritici partes quadam tenuiores sunt ac puriores, aliæ crassiores impurioresque, quas inter se commixtas ac confusas, tota farina continet.

Purissima, mollissima, nec non tenuissima ea est, quæ ab omnibus furfuribus exactissime repurgata. Dicitur hec Latinis Flos & Siligo, translato à candidiore ac leuiore Tritico nomine, quod propriè, ut diximus, Siligo nuncupatur. Græci voce à Latinis mutuata hanc partem σιλίγην appellant, proprio, ut Galenus ait, nomine destituti, σειδαλις, inquit, Græcum nomen & antiquum, σιλίγης vero neque Græcum, neque ipsam aliter possum exprimere: lib. I. De aliment. facil. Alij tenuissimam hanc partem, γύρος, ac πανωάλιον appellari existimant. Hesychius tamen γυρόν αἴρει, ἀντόνεγρον siue con. usaneum interpretatur, & πανωάλιον, Hordei Miliique non farinæ tenuissimum; sed ζάλον λεπτὸν, hoc est, farinam tenuem.

Plinius purissimam Tritici farinam Latinè etiam Pollinem nominat, sic tamen ut inter eum & florem discriminis non nihil faciat. Flos siquidem purissima ei est farina Siliginis, siue candidioris Tritici, Pollen vero Tritici alterius. Pollinem, ait, appellant in Tritico, quod Pollen. florem in Silagine. Verum in hoc significato Pollinis nomen à Cornelio Celso non usurpatum, qui per Pollinem impuriorum ac furfuraceam farinæ partem intelligit; vt pote ex quo panes sunt cibarij, aut pyris impuriores infirmioresque, veluti hæc ipsius verba lib. II. cap. XVIII. euidenter commonstrant. Ex Tritico firmissima Siligo: Simila deinde, cui nihil ademptum est (quod ἀντόνεγρον Græci vocant) infirmior est: ex Polline infirmissimus cibarius panis. Quæ Corn. Celso verba cum ijs conueniunt, quæ a Paulo Ægineta hunc in modum scripta sunt, lib. I. cap. LXXXVIII. Τεφιματαξε δὲ τῶν αἴρετον σιλιγίτης, εφεζης δὲ σειδαλίτης, καὶ τεῖλος οὐγκόμιστος, δὲ πυραέρος αἴρετον μέρη βίστει.

Quod cum Marcellus Vergilius obseruauerit, ac in Commentarijs, quos in Dioscoridem edidit, scriptum reliquerit, admirari animo subit, qua ratione vel argumento inductus Pollinem existimare potuerit tenuissimum puluerem magis esse quam farinam, qualis circa molas plerumque, & loca in quibus panis pinsitur, parietibus hærens inuenitur. Nam si panis ex Polline, cibarius, ac πυραέρος Græcorū responderet, (ut ordo ipse ostendit) Pollen Corn. Celso non puluis vel farina tenuissima, sed aliud nihil esse potest, quam fordidior farinæ pars, furfurum multum habens, ex qua purissima mollissimaque farina excussa est. Ex Polline siquidem cibarium panem, post ἀντόνεγρον Celsus collocat, eodem videlicet loco, quo apud Græcos πύραέρος.

Post Florem siue Siliginem, Similago, quæ & Simila est, à Græcis σειδαλις dicta, & te-
nus quædam farinæ pars, sed Silagine impurior, vt pote ex qua non omnes excussi sunt fur-
fures, sed crassiores tantum repurgati: medium videlicet quoddam genus inter florem & fa-
rinam confusaneam. Laudauit hanc Martialis in Xenijs hoc disticho:

Nec dotes poteris Simila numerare nec usus,

Pistori toties cūn sit & apta coquo.

Ex crassioribus vero moliti Tritici partibus, una quidem impurior, quædam & furfuracea farina est, ex qua Flos siue Siligo hoc est, tenuissima farinæ pars excussa est, altera vero crassiorum partium furfures sunt Priorem Corn. Celsus, ut diximus, Pollinem appellat: unde & excussoria per quæ floris fit secretio, Pollinaria Plinio dicuntur. Posteriorem veteres Canicas, Græci πύραέρος nominant, Palladio cretura est, plerique vtriculos & exta Tritici dici volunt: alijs Græce πυραέρος appellant, quæ tamen Galenus Hordei purgamenta interpretatur, in expositione linguarum Hippocratis.

In horum omnium medio farina est, omnes frumenti partes in se continens, cui nihil vel floris vel furfurum decepsit, Latinè Farinam dixeris confusaneam, Græci communi nomine αἴρετον nuncupant.

Ex hac panis coctus ἀντόνεγρος nominatur, & οὐγκόμιστος, quasi confusaneus, quoniam ca-
stratus non sit, sed simul omnia ferat: item & ζάλοντης, ξερνετης, πύραέρος: ac teste Hesychio, γύρος.

Sed

*Silagineus
panus.*

Sed ex purissima, mollissima, nitidissimaque farina Silagineus ac σιλιγίνης dicitur. Quod & Iuuenalis Sat. v. ostendit, seruari referens domino, ex Silagine confectū panem, his verbis:

*Sed tener & niueus mollii, Silagine factus
Seruatur domino.*

*Similagi-
neus panus.
Cibarius
panis.*

Ex Similagine verò, Similagineus & σιμιλαγίνης.

Qui autem ex polline siue furturacea farina coactus est, πύραψες nuncupatur, ac Latinè Cibarius, gregarius, ac sordidus, pauperum ac seruorum olim cibus.

*Furfura-
ceus panus.*

Pacuuius sordidum panem Canicaceum, Festus Pompeius Acerosum nominat. Ex horum genere πυρεῖας, hoc est, Furfuraceus, qui furfuris plurimum recipit.

Panis autem nomen à Pano dici Varro putat: Messapij redundantiam & saturitatem πυρεῖας (testis Athenaeus) appellant: vnde Latini nomen Panis deflexerunt, vt Ruellius ait.

Parantur porrò omnes panes aut cum sale & fermento, aut absque his: item aut in clibanō furnōve coquuntur, aut in craticula, aut sub cineribus, vel alio modo.

*ζυμής
άρτος.*

Qui fermentum ac salem accepit, ζυμής & fermentatus, absque fermento verò factus αζυμός, non fermentatus, & à Nicandro Colophonio ἀρέπος appellatur: testis Athenaeus.

*Azymus
panus.*

Κλισαρίτης ή κεισαρίτης appellatur in clibano coctus, idem Varroni Testuaceus; nam κλισαρίτης βαρον testum nominat. Ex horum genere κεισαρίται quoque sunt, in maioribus furnis cocti.

*Escharites.
Επαρθεῖας*

Εχαρίτης super craticulam torretur. Huic similes sunt, super cineres calidos, επαρθεῖας Athenaeo dicti, aut foci pauimentum afflati. Escharitem, Athenaeus ait, passo olim intungi solitum, ac sub finem mensæ inferri, multis rebus iucundis ac mollibus ita mistum, vt multam habeat ob delicias, ad vinum passum proportionem, sic vt ebrios quasi resipiscere faciat, ac rursus esurire eos, qui anteā satis comedérant.

*Subcineri-
tius.*

Εγκρυφίας, siue ἔγκρυψθος, Latinè Subcineritus dicitur, qui cineribus obductus coquitur, qualis Iudeis olim familiaris.

Biscoctus.

Est & σπυρεῖτης siue δίφθος, Biscoctus, qui ignem ac coctionem bis expertus est.

Inter panes autem (vt Galenus in libr. De alimentorum facultatibus scribit) Silagineus plurimum alimenti prestat: post ipsum autem Similagineus: tertio loco medius, qui & συγκριμένος καὶ αὐτόνεος: quartum post hunc est πυραψώ, siue sordidorum genus, in quibus πυρεῖας, hoc est, Furfuraceus, postremus est, minimumque omnium nutrit, & omnium maximum per alumum secedit.

Concoctū autem inter panes, sunt facillimi, qui plurimū sunt fermentati, & probissimē subacti, quique in clibano igne moderato cocti sunt: vt Galenus refert. Quibus similes & haud deteriores furnacei sunt, κεισαρίται dicti.

At qui super craticulam, aut cineres calidos, aut foci pauimentum assantur, prauī omnes sunt, vt qui inæqualiter se habeant; nam partes ipsorum extimæ supra modum sunt coctæ, interiores autem cruda.

Ceterū ijs, quos Subcineritos nuncupant, propterea quod cineribus tecti decoquantur, cineres ipsi prauitatem quamdam aspergunt; quapropter omnium panum (si ipsis cetera omnia pariter adfuerint) quod ad assandi saltem modum attinet, propemodum sunt deterrimi.

Panis cum melicerato coctus, (Dioscorides ait) & crudus, inflammations omnes impositus mitigat. Nam emollit & quadam tenus refrigerat, præsertim herbis succisive quibusdam permistus. Vetus panis ac aridus, cùm per seipsum, tum quibusdam admixtus, citam aluum cohibet: recens autem muria maceratus & impositus, vetustas impetigines sanat.

Quod ex pane fit cataplasma, vt Galen. lib. De facul. simplic. medicament. tradit, vim habet magis digerentem, quam quod ex Tritico; nimirum cùm sale & fermentum panis adiuncta habeat. Fermentū etenim vim habet attrahendi, digerendiq; ea quæ in alto resident.

De Zea. C A P. I I I I.

ZEA, siue, vt vulgo, Spelta, culmis spicaque Tritico similis; culmis enim assurgit numerosis, geniculatis, Hordei altioribus, spicam profert inconditam, vt plurimum absque aristis, grana multiplice folliculo, à quo non facile deglubuntur, inclusa, geminis vtriculis duo simul iunguntur, quæ repurgata & è glumis extrita, Tritici granum referunt: radix ei quoque, vt Tritici, multiplex.

Nascitur qualicumque solo, etiam humidiore, quoniam folliculum, ait Columelia, quo continetur, firmum ac durabilem aduersus longioris temporis humorem habet; lato tamen pinguique melius proficit.

Mutatur atque in Triticum transit, si pista atque purgata feratur, idque non protinus, sed anno tertio, vt Theophrastus tradit.

Spelta, vt diximus, vulgo nominatur; Germanis Speltz; nonnullis verò Dinkel / nostris
Spelte /

Syelt: Gallis *Espeautre*: Italorum plerisque *Pirra farra*: Hetruscis *Biada*: Insubribus *Alga*, quasi alica. A Græcis *Zeas* *Cere* nuncupatur.

Zæs autem genera Dioscorides duo facit, unam *zæs* sive simplicem; alteram *dinornon*, quæ in duobus putaminibus grana bina coniuncta fert. Et autem Spelta Dioscoridis quidem Dicoccus, quæ eadem est cum Theophrasti ac Galeni Zæs.

Antiquissimi ac prisci Latinorum, Zæm sive Spelta, Far nuncupauere, ut locupletissimus testis est Dionysius Halicarnassæus: Nominabant (inquit) prisci Romani sacras nuptias vocabulo suo *φαρράκια*, quia coniuges vescerentur eodem Farre, quod nos Græci *ζεαν* dicimus. idem affirms Asclepiades apud Galenum, *κατὰ τόπος lib. 9.* ita scribens: *φαρροῦ καλοῦται ζεαν*. id est, Farris, quod *ζεαν* appellant.

Appellatur verò Far istud Latinis quoque Ador, Adoreum, & semen Adoreum, ac à posterioribus propter frugis præstantiam, peculiari nomine Semen. Hoc populum Romanum tantum e frumento CCC. annis vsum, Verrius tradit.

Genera huius Columella quatuor scribit: Far Clusinum candoris nitidi: Far quod vocatur Venniculum rutilum, atque alterum candidum, sed utrumque maioris ponderis, quam Clusinum: Semen trimestre, quod dicitur Halicastrum, id est, pondere & bonitate præcipuum,


Ex his cum Halicastro conuenire Spelta posset, si trimetris esset, ac Vere sereretur, verum cum Autumno seratur, Venniculum albo magis similis esse videtur. Nam veluti Venniculum, sic & Spelta, pondere præstat ac candida est.

Nutrit Zæa Hordeo, vt Dioſ. tradit, potentiū, *ευσόμος*, hoc est, ori grata est, (Galenus *ευσόμος*, hoc est, ventriculum iuuat;) panifica ex eo confecta minus quam ex Tritico nutriunt.

Galenus Zæm vniuersa sua facultate, in medio quodammodo Tritici & Hordei esse, in lib. De simplicium medicamentorum facultatibus, scribit.

De frumento Monococco. C A P. V.

Monococcon.



Q uod Germani *Einkorn* hoc est, Monococcon, sive unius grani appellat, ad Zæm recentiores quoque referunt, breuioribus est & tenuioribus quam Zæa culmis: spicæ in ordines quosdam veluti Hordei digestæ sunt, ac aristæ habent asperas: semina parua sunt, Zæa granis minora, singulis singula vtriculis contenta, à quibus non in area, sed in mola, ac quo Zæa modo, repurgantur. Culmis autem id, glumis, aristis, semineque nigri ex rubore coloris esse, *Tragus* tradit. In Belgij tamen hortis satum, Tritico aut Hordeaceo colore satis simile enatum.

Nascitur asperis & montosis plerisque Germaniae locis.

Autumno cum reliquis frugibus seritur, serius tamen ac subinde Septembri demum mense maturescit.

Dinkel ac *Dinkelkorn* à quibusdam etiam appellatur: ab aliis *Sant Peters korn* id est, D. Petri Frumentum: à nonnullis *Blicken* agro Vormatiensi *Einkorn* quod Monococcon sonat.

Nostræ temporis scriptores, vt iam diximus, ad Zæm referunt, ac *zæs* sive simplicem Zæm Dioscoridis esse volunt, & nec temere quidem.

Potest verò idem & Mnesithei Zæa esse, quam *Zea Mnesithei*. ipse Typha sua deteriorem facit; Typham nimurum, quæ Theophrasto Zæa est; Zæm autem, translati & transpositi vocabulis, aliud omnino genus faciens, quod communi Græcorum Zæa, à Theophrasto ac aliis descripta,

longè sit deterius. Nam simplex Dioscoridis Zæa cum Mnesithei Zæa conuenire videtur, & non alia de cauſa Zæa generi adscripta, quam quod aliud eius nomen ignoraretur, à Mnesitheo autem Zæa nominaretur. Simplicis siquidem Zæa Theophrastus, Diocles, & alii plerique Dioscoride vetustiores non meminerunt.

t

Mnesi-

Brixa.

Mnesitheus autem hanc Zeam, Galenus non absque ratione conuenire cum eo frumento suspicatur, quod Macedoniae ac Thraciae incolae Brizam appellant; frumentum Typhæ Græcorum, quæ in Asia nascitur, non arista modo, sed & tota planta simillimum; ex quo panis fit ater, grauis odoris, ac membranosa substantiam habens: cum qua Monococcon istud non exiguum quoque similitudinem ac affinitatem habet. Panis etenim, qui ex Monococco conficitur, ex rubore nigricat, sordidus atque ingratius saporis, (Trago teste) est; veluti ex Brixa factus.

Frumentū loculare.

Conuenire prætereà Monococcon istud videtur cum ea Farris, ac Frumenti barbati, siue, ut vulgo Galli nominare consueueré, Bladi apud Ruellium specie, quod Rubrum agricolæ appellant frumentum; partim etiam Locar, quasi loculare, quod pluribus tunicis perinde quasi loculis inuolutum condatur; partim item Pullare, quia ex rubro in pullum degeneret colorem. Serunt id Galli, ait Ruellius, concavis tractibus, qui facile sentiunt rubiginem. Nam istud, ut volunt, nec pruinias, nec rubiginem horret; in perflatis & excelsis, eti benè conualescat, sationem tamen inibi damnant.

Far Venni- culum ru- zatum.

Similitudinem quoque nonnullam, fortassis & Monococcon cum Farre Venniculo rutulo habet: verùm in tanta Columellæ breuitate, simile aut idem sit, nec ne, quis diuinauerit. Multa siquidem sunt frumentorum genera, suis regionibus peculiaria, quæ licet aliarum regionum seminibus similia videantur, in aliquo tamen subinde differunt; idque partim loci natura, partim cultus atque humanæ industriae occasione: quæ ambo ad mutationem & feminum & herbarum plurimum possunt.

Ex Monococco autem panis confectus, ater est & hominibus ingratus, ut superius scriptum, & Tragus ait.

De Amyleo frumento. C A P. VI.

ZE generibus non perperam quoque accedit Amyleum Germanis dictum frumentum, æstiuum siue trimestre genus, quod culmo ac grano Triticum proxime refert; ceterum spicam habet, aristis quibusdam Hordei fere similitudine cinctam, ac in duos versus digestam. Semen folliculis includitur, & non secus ac Zea, repurgari postulat.

Seritur Vere.

Germani, quia ex eo amyllum conficiunt, Amelior appellant, Latinè Amileum frumentum dixerimus. Existimant Tragus & Fuchsius trimestre Triticum esse, sed cum granum habeat glumis conditum, ex Tritici generibus esse nequit. Inter Farra citius reponendum fuerit, inter quæ Halicaltrum forte erit. Hoc enim, teste Columella, Vere seritur, & trimestre eam ob causam cognominatur.

De Oriza Germanica. C A P. VII.

AD Zeam quoque referre consentaneum videtur, Orizam Germanicam à Trago nuncupatam. Frumentum est culmis geniculatis, spicis, aristis asperis atque acutis, Hordeo simile, singulis tamen maioribus, & grano candidiore, quod vtriculis etiam continetur, ac Hordei, aut Zeæ modo deglubitur. Ex æstiuarum siue trimestri frugum numero est.

Apud Mediomatrices, cum aliis trimestribus seminibus lætissimis agris seritur.

Nomen huic Orizæ Germanicæ à vulgari nomenclatura Hieronymus Tragus inuenit, qui & ipsam Farris speciem, ac Tragum cerealem esse existimat, in quo veritatem nobis haud videtur assicutus. Nam Tragus ille Chondro assimilis, ex Olyra aut confimili aliquo, res factitia est, ut Galenus testatur, tantum abest, ut frumentum aliquod naturale sit.

Olyræ autem magis similis Oriza hæc Germanica est, quæ à Dioscoride Zeæ generi adscribitur, aut Plinius Santalo, Farris Gallici specie, nitidissimi grani, illic Brance, ait Plinius, vocant: aut certè Farri Clusino, quod forte idem cum Plinius Santalo est. vtrumque enim candidum, & Clusinum, à Clusio dici potuit, oppido transpadanæ Italiæ, quæ alias Togata Gallia nominatur. Si quid repugnet, quod minus hæc Oriza, vel Clusinum, vel Olyra sit, sola vtiique erit vernalis satio. Nam Olyra & Clusinum Far, ex hibernis fermentibus sunt. Adeò certi de plerisque fermentaceis definiri nihil potest, cum propter veterum ipsorum breuitatem, tum frumentorum appellations aut diuersas, aut sæpenumerò confusas, eamdem rem aliis alter subinde appellantibus.

Ruellius Farris Gallici, siue frumenti Barbati genus quoddam esse ait, cuius granum candidius, ac spica minoribus aristis circumuallatur, quam Locularis, quod, inquit, Clusinum putatur: istud autem an simile sit, vel idem cum Oriza Germanica, expendendum est.


Vtis autem Oriza Germanica, ad multa culinæ opera, cibis admixta ori grata est: cum lacte Orizæ in modo decocta, probe alit,

De

*Santalum
Plinij.
Far Clusi-
num.*

De Zeopyro. C A P . V I I I .

Zeopyron.



ANNVMERATVR præterea & Zeis, quod Germani Kern appellant. Nascitur hoc, inquit Tragus, eodem quo Spelta modo, nisi quod semen huius non perinde ac Zeæ siue Speltæ glumis ac folliculis inuoluatur, sed in area facile exteratur; veluti Triticum, cui subluteo colore simile est.

Seritur plerisque Germaniæ locis, ad pistinarum & culinarum opera, in quibus Hordei usum præbet.

Ziowegy quoddam esse videtur, utriusque enim similitudinem ac naturam habet, *Zea* vi- delicet ac *melegy* siue *Tritici*. Cum Chondro aut Alicia rebus factitiis (quod Tragus suspicatur) nullatenus conuenit.

Zeopyron siquidem, ut Galenus in lib. De alimentorum facultatibus scribit, utriusque naturam refert: ac sicuti nomen ex *Zea* & *Pyro* compositum, ita substantia eius inter utrumque media quodanmodò est, veluti si ex utroque esset commixta.

De Olyra ac Typha, ex Theophrasto, Galeno,
& aliis. C A P . I X .

OLYRAM ac Typham Maesitheus idem frumentum, utroque nomine appellatum existimauit, sed eius opinionem Galenus reprobat, Diocles ac Theophrasto accedens, qui Olyram à Typha distingunt. Olyram Dioscorides Zeæ generi ascribit.

Theophrastus Olyram ac Typham inter ea quæ mature feruntur, ac Triticum similia sunt, enumerat; & Olyram quidem ait, Zea ac Bromo molliorem atque infirmiorem, Typham verò omnium leuissimam: nam simplici culmo assurgit, & solo tenui contenta est; nec, uti *Zea*, pingue lœtumque desiderat. Utramque præterea scribit multiplici folliculo includi: ac Typham uti *Zeam* in Triticum mutari solere, si pista feratur, idque non protinus, sed tertio anno.

Plinius Olyram Latinis Arincam dici affirmat. Ex Arinca, inquit, dulcissimus panis: ipsa spissior quam Far, & maior spica, eadem ponderosior, raro modius grani non XVI. libras implet: exteritur in Gallia difficulter, ob id iumentis dari, ab Homero dicta, hec est enim quam *ολυρη* vocant.

Recentiores Typham, cognominant cerealem, ad differentiam nempe alterius Typhæ, quæ in paludibus enascitur, de qua infrà suo loco.

Typhæ semen, Galenus ait, corticem extrinsecus veluti Olyra ac Hordeum habet. Quod verò ad colorem naturalem attinet, in Hordeis quidem ac Olyris est albus, in Triticis verò subflavus: Typhæ autem vel Triticis sunt flauiores. Quin & harum corpus coactum est ac densum, quod fortassis ad seminis paruitate nonnihil adfert momenti. Est enim id Triticum longè exilis, quamquam non desint, qui ipsum quoque in Tritici numero ponant, velintque id semen esse, cuius Homerus meminit, cum Hectorem equos suos alloquenter facit; his verbis:

Τινὲς μὴ τερπεῖσθαι μελιτερα πολὺν ἔπεικεν

Hoc est, Triticum enim vobis primum prædulce ferebam. Aiunt enim Typham paruum Triticum esse, eamque equos sine noxa mandere, verum autem Triticum non absque noxa. Nec absurdè certè Typham quis exile Triticum vocauerit, cùm ei & colore, & densitate, & caliditate sit assimilis. Utramque autem semen, Olyra videlicet ac Typhæ, in Asia est frequēs, & potissimum in regione quæ est supra Pergamum, adeò ut rustici ipsi panibus ex iis factis semper utantur, propterea quod Triticum omne in oppida comportent. Olyrini sane, si modo ex bona Olyra fiant, post Triticeos saltē sunt præstantissimi: secundi autem ab his sunt Typhini. Quod si Olyrini ex vito lo semine sunt facti, Typhini non erunt eis inferiores. Cap.

lidi verò panes ex laudatissima Typha facti, Olyrinis longè sunt præstantiores, afferuati verò deteriores seipſis euadunt. Cùm enim massa eorum sit tenax ac ductilis, densatur maiorem in modum, & maximè cùm negligēter parati fuerint, adeò ut qui panem huiuscemodi, post vnum aut duos dies, ac multò magis sequentes aliquot, comedere, putaturus sit lutum ventriculo suo inesse. At calidus adhuc cùm est, ab ipsis etiam vrbani expeditur, ipsumque cum caseo quodam mandunt, quem vernaculo nomine ὄξυτακτον appellant. Porrò hunc quoque tenerum esse oportet, & ipsum panem calorem clibani adhuc retinere. Qui certè hunc in modum est paratus, non rusticis modò, sed vrbani quoque hominibus in deliciis habetur.

Qui verò trium quatuorve dierum est, vel ipsis rusticis manditur insuauius: prætereà concoctu est difficilior, ac tardius per aluum subducitur, quæ calido minimè accidunt: qui tametsi ab Hordeaceo, quod ad deiectionem attinet, multum relinquitur; non tamen in eo adeò, ut Miliaceus, est vituperandus. Quin etiam corpus admodum, dum calidus est, nutrit, ut pènè Triticeo syncomiso par sit.

Congeritur autem in panes Typhæ semen repurgatum, omniq[ue] vſu accommodatur: nam & ex aqua manditur, haud aliter ac vocatum à rusticis ξύτακτον, hepsemate, quod alij σίριζον nominant, iniecto: nonnumquam etiam cum sale esitatur.

Et de Zea atque ei similibus haec tenus: nunc ex his factitia sequuntur, quæ apud veteres in vſu esse solent, ut sunt, Far, Chondrus, Alica, Tragus, & similia.

De Farre factitio. CAP. X.

FA R aliás naturale frumentum, quod Græcis, vti ostendimus, ζέα καὶ ζεία appellatur, aliás res factitia artisque & non naturæ opus, de illo superioribus capitibus, de factitio verò modò.

Fuisse autem istud apud veteres illos Romanos, quos pulte farracea, non pane, longo tempore vixisse Plinius scribit, ex Farre frumento factum, nomen ipsum & frugi & rei factitiae commune, indicat. Quod inde translatum est, ad cuiusvis frumenti granum, ab vtriculis quibus conditur, eo modo, quo Archigenes Far confici tradit, repurgatum, atque in partes confractum. Nam & far Hordei, Palladius vino conspersum, phasianorum pullis primis diebus dare præcipit. & Plinius in Ægypto ex Olyra Far confici lcriptum reliquit.

Modum autem conficiendi Farris, Archigenes apud Aëtium Sermone IX. ostendit: Σίτων id est, frumentum, ait, modico tempore aqua madefacito, indeque extractum ac in pilam coniectum, veluti ptisanam à cortice repurgato: vbi verò corticem exuerit, tollito atque in sole siccato: deinde manibus tritum, donec penitus à cortice fuerit mundatum, crassissimè molito, ita ut granum vnum in quatuor aut quinque partes redigatur, & siccum afferuato.

Porrò factitium istud Far, præfertim ex Zea sive Farre frumento, plerique nostræ ætatis idem cum Chondro aut Alica esse existimant, similitudine quadam eorum inducti. Chondro etenim simile est, non tamen idcirco idem, veluti ipse Archigenes ostendit, quando Far Chondri modo coqui scribit.

Differentiam horum præparationis modus efficit. Chondrus siquidem gypso arena addita (ut paulò pōst dicetur) purgatur: Far absque his cum aqua sola. Differt verò etiam ab Alica; Far etenim antiquum, quo Romanorum vetustissimi vixerunt; Alica verò, ut Plinius ait, res noua ætate Magni Pompeij nondum cognita, cui non solùm aqua, sed & creta candorem teneritudinemque confert. Differentiam prætereà horum etiam ostendit Trallianus lib. & cap. VIIII. vtrisque vti diuersis vtens, & eorum inter se comparationem faciens.

Quod autem Germani ac finitimi Frisij, Hollandi, Batauique ex Hordeo & Auena conficiunt, Farri simillimum est, ac eius quoddam genus: Germani Grupen / Hollandi Goet appellant, & ex Hordeo quidem Gersten Grupen / Gersten Goet / ex Auena verò Haberen Grupen / Hauerent Goet.

Ceterū Far quod ex Zea factum est, facultate Chondro aut Alicæ quodammodo simile est, nutrit ea de caufsa valenter, sed tardius descendit, & griseoque concoquitur. Vt fus tempore, ut Archigenes tradit, Chondri modo coquitur, & à fanis in cibo sumitur. Pro agris verò variè apparatur, & epithematis quoque admiscetur. Ex Hordeo autem vel Auena Far leuius est, minulque alimenti adfert.

Est & Far apud Aëtium cognomento Clusinum, non naturale aliquod Far; verum puls quædam Farracea, de qua Martialis Epigrammaton lib. XIIII.

Imbue plebeias Clusinis pulsibus ollas;

Vt satur in vacuis, dulcia musta bibas.

Far Clu-
sinnus.

De

De Chondro & Halica. CAP. XI.

CHONDROVS & $\alpha\lambda\eta\zeta$ ex factitiarum similiter rerum numero sunt. Fit autem vtraque ex Zea, & Chondrus quidem ex Zea Dicocco, Dioscoride auctore. Theophrastus & ex Hordeo silvestri bonum fieri Chondrum tradit. Galenus Chondrum ex Tritici genere esse ait, quod nihil aliud sonat, quam ex Triticeo genere ipsum confici, non quod Tritici aut alterius frumenti aliquod genus sit, veluti nonnulli perperam sibi persuaserunt. Non enim frumenti aliquod genus, sed res planè, ut diximus, factitia.

Galen & aliorum Græcorum medicorum interpres $\chi\omega\rho\rho\rho$, Latinè Halicam siue Alicam interpretantur, Chondrum omnino idem cum Halica esse putantes; qua in re non parum à veritate recesserunt. Chondrus siquidem & Halica differunt, veluti abunde unus pro multis Paulus Ægineta non uno ostendit loco: aut videlicet de vtrisque seorsim agens, & suas cuique vires ac facultates tribuens, ut lib. I. cap. LXXXVIIII. aut unam alterius loco substituens, veluti cap. XIX. XXXIX. & LXII. libri tertij.

Differunt autem hæc inter se, non quidem toto genere, sed quodammodo, veluti genus & species, aut potius ut unius generis duas species. Nam Halica siue Alica, Latinis ac Plinio generalius est nomen, Græcorum cum $\chi\omega\rho\delta\epsilon\gamma$, tum $\alpha\lambda\eta\zeta$ ipsis peculiariter nominatam, sub se continens.

Est enim una Halica ex Zea, quæ Semen appellatur, propria quidem ac genuina, quæ à Plinio, lib. XXII. res Romana esse fertur, Magni Pompeij tempore nondum in usu. Hæc à Paulo Ægineta Græcè $\alpha\lambda\eta\zeta$ dicitur, & à $\chi\omega\rho\rho\rho$ ipso præparationis modo differt; non enim gypso & arena veluti hic repurgatur, sed creta candorem perfectionemque suam assequitur.

Est vero & altera Halica, ex Zea in Africa degenerante, cognomento adulterina, Græcorum Chondro simillima: gypso siquidem & arena, veluti Chondrus perficitur: licet tamen Halica quidem ex degenerante, Chondrus vero ex Dicocco Zea fiat. Nam præparandi ratio apud vtrasque nationes consimilis, eamdem esse rem prorsus ostendit, quemadmodum & ea dissimilis res diuersas. Non enim tam species frumenti, quam præparandi conficiendi ritus ac modus considerandus. Frumenti enim aliqua diuersitas, speciem rei factitiae non videtur mutare, modò in præparandi ratione nihil varietur. Siquidem ex Zea & Hordeo Far: ex Zea & Hordeo silvestri Chondrus: ex Hordeo & Tritico Ptisana confici possunt.

Qua autem ratione Chondrus conficiatur ac præparetur, in libris De agricultura, siue $\gamma\alpha\pi\pi\pi\pi\pi\pi\pi$, Constantino Imp. dicatis à Cassio Dionysio Uticensi, docetur his verbis:

Zea tunditur & in feruentem aquam iniicitur, ac premitur, deinde gypsum album tusum cribatum, & arenæ albissimæ ac subtilissimæ ad gypsum pars quarta paulatim admiscetur, donec Zea probè repurgetur. Præparetur autem in Canicularibus diebus, ne acescat. Postquam vero rursus totus perpurgatus fuerit, per cribrum densius excutiatur. Optimus est Chondrus, qui primùm excussus est; secundum locum habet, qui succedit, deterior autem tertius est.

Halicarum vero præparationem Plinius lib. XVIII. cap. XI. tradit: Halica fit, inquit, ex Zea, quam Semen appellauimus: tunditur granum eius in pila lignea, nam lapidis duritia conteritur. Nobilis, ut notum est, pilo vinctorum poenali opera, primori inest pyxis ferrea, excussis inde tunicis, iterum iisdem armamentis nudata conciditur medulla; ita hunc Halicæ tria genera, minimum, ac secundarium; grandissimum vero $\alpha\phi\alpha\pi\mu\alpha$ appellant: nondum habent candorem suum, quo præcellunt, iam tamen Alexandrinæ præferuntur. Postea, mirum dictu, admiscetur creta, quæ transit in corpus, coloremque & teneritatem adfert.

Deinde paulò infra: Halica adulterina fit maxime quidem ex Zea, quæ in Africa degenerat. Pinunt cum arena, & sic quoque difficulter conterunt vtriculos, fitque dimidij modij mensura, posteaque gypsi quarta pars inspergitur, atque ut cohæsit farinario cribro subeernunt. Quæ in eo remansit, exceptitia appellatur, & grandissima est: rursus quæ transit, arctiori cernitur, & secundaria vocatur: item cribraria, quæ simili modo in tertio remansit, cribro angustissimo, & arenas tantum transmittente.

Et hactenus quidem Cassij & Plinij verba: ex quibus manifestum est, $\alpha\lambda\eta\zeta$ à Chondro differre, & Chondrum cum secunda Plinij Halica conuenire, vtramque item rem factitiam esse, & non peculiaria frumentorum genera.

Ceterum Chondrus, vti Paulus libro primo tradit, egregie nutrit, & glutinosos parit humores; verum puls ex eo confecta nocet, quoniam quamprimum crassescens incocta permanet. Probatur magis $\chi\omega\lambda\zeta$ ipsius ex integro Chondro bene decocto, expressus ptisanè similis.

$\alpha\lambda\eta\zeta$ in ceteris Chondro quidem respondet, sed aluum magis adstringit.

Galenus Chondrum valenter nutrire, ac succum lentum habere affirmat: siue in aqua dumtaxat coctus, cum mulso, vino dulci, adstringentive: siue cum oleo saleque frixus sumatur.

*Xerophyto-
tum.* Atque eo modo, inquit, Chondrum medici ptisanæ fuisse confectionem dicitant; quidam autem ex *χονδρόθλασάντες* ægrotum fuisse cibatum.

Veterum vero nonnulli, vt Diocles & Philotimus, *πίασαντες πνεύματα*, Chondrum hoc modo apparatum appellant. Et vno quidem horum modorum, eo videlicet qui prior est, Halicam etiam coqui ac edi apud Romanos solitam, Martialis in Xeniis hoc disticho ostendit:

*Nos Halicam, mulsum poterit tibi mittere diues;
Si tibi noluerit mittere diues, eme.*

De Trago. C A P. XII.

TRAGVS Chondri, vt Dioscorides ait, similitudinem ac figuram gerit, res quoque factitia. Fieri eum, Galenus in lib. De alimentorum facultatibus, ex nobilissima Olyra ait, cum ut decet fuerit excorticata: in Commentariis verò lib. primi De ratione victus in morbis acutis *ἐν τῷ ζειων*, hoc est, ex Zeis, quarum utique Olyra species est. Cassius Dionysius Tragum ex frumento conficit Alexandrino. Plinius lib. xviii. ex Tritici semine in Campania dumtaxat & Ægypto fieri tradit. In Ægypto autem, cuius celeberrima ciuitas Alexandria, Olyra facilis fertiliisque eiusdem lib. cap. x.

A Chondro & Halica & materia, sed potissimum ipsa præparatione differt: Chondrum siquidem, gypsum & arena perficiunt, Halicam creta emundant; Tragus sola aqua maceratus excorticatur.

Eius conficiendi modum Cassius tertio De agricultura lib. sic docet: Frumentum Alexandrinum appellatum, maceratur decorticaturque, & in sole calido siccatur; deinde idem rursus fit, donec ei pellicula & quidquid fibrolum est, in frumento delabatur. Appellatur autem Tragus iste, subinde cognomento frumentaceus, ad discrimen eiusdem nominis, & animalis, & herbæ, non quod naturale aliquod frumenti genus sit. Nam ut veterum auctorum testimonis abunde constat, res factitia est.

Trago autem, Galeno auctore, plerique vtuntur, primùm eum in aqua decoquentes, deinde ea effusa *ψηφιζουσι*, aut vinum dulce, aut mulsum infundentes, superiniciunt & nuces pineas aqua præmaceras, donec plurimum intumuerint: multò tamen minus quam Zea, Dioscorides ait, nutrit.

De Amylo. C A P. XIII.

AMYLOM ex Silagine fit, vt Cato scribit; item & ex Zea: optimum verò ex Setanio, auctore Dioscoride. Fit etiam in Germania hac ætate, ex eo quod Ameliorum id est, Amyleum frumentum nuncupatur, quod veluti Zea quædam trimestris ac Halicastrum (vti scripsimus) est.

Rationem conficiendi paucis complexus est Cato cap. LXXXVII. Dioscorides latius his verbis tradidit: Purgatum trimestre Triticum madescit quinques die, & si fieri potest nocte, cum emolliri cœperit, effundatur sensim sine agitatione aqua, quod minus, quod utile est, vna effluat. Vbi molissimum factum fuerit, effusa aqua pedibus calcare oportet, deinde affusa aqua iterum calcare, tum enatantes ibi furfures, cribro excipiendi, reliquumque per colum traeictum, confessim in tegulis nouis sub ardentissimo sole siccandum. Nam si vel modice humidum manserit, acrem contrahit.

A^νυλον autem ex eo nomen habet, quod absque mola, Græcis μύλη dicta, fiat. Officinae corrupta voce Amydum appellant; Germani Amme, Krajmec: Brabantii Ameliorum, & quod glutine inde facto mulierum pepla inalbentur, ac durentur, Stijssel.

Triticum, inquit Galenus, cum frigidius, tum siccus est: lœuigandi exasperatas partes vim obtinet. Dioscorides sanguinis rectiones potu cohibere, contraque oculorum fluxiones, cælotetas, pustulasque efficax esse addit: quod verò ex Zea fit, nullius in medicina usus esse, ad alia tamen conueniens.

Amyli suc-
cedaneum. Galenus lib. vii. κατὰ τόπου Amyli loco, Silagine, id est, purissima Tritici farina utitur.

De Athera & Kóλα, sive Glutine. C A P. XIV.

AATHERA sorbitio est, inquit Dioscorides, ὁστιρ πολτάσιον γέγεν, id est, veluti pulicula liquida. Fit ex Zea tenuissime molita. Apud Belgas non ex Zea tantum, sed ex quavis etiam puriore farina coquitur; veluti Secalis, Hordei, frequentissime autem Tritici, cum tenui ceruisia vel alio liquore permixta.

Est autem edulium, quod citò concoquitur, facileque nutrit, infantibus idcirco & senibus conueniens; interiora tamen viscera nonnihil obstruens. Datur capite dolentibus, ex tenuissima Secalis, vel Hordei farina, dolorem enim sopit, & somnum clementer conciliat.

Athera crassius & solidius est gluten, Græcis κόλα, ex Similagine & farina Tritici, quo chartæ

* Kölle.

chartæ glutinintur. Quod propter eam, quam habet obstruendi vim, sanguinis excreatio-
nibus prodest.

In veriusque medio αὐλτὸς, siue puls est, solidior quidem ac spissior Athera; liquidior vero
Glutine; & minus Glutine, plus autem quam Athera viscera obstruens.

*Πολτός.
Puls.*

Atheræ, aut potius pultis genus est, edulium, quod Galenus ex multa Tritici farina lacti
permixta fieri scribit, quo hac ætate Belgum, ac vniuersa inferior Germania frequentissime
vtitur. Cibus boni succi & multi alimenti, sed eos, qui ipso assidue vtuntur, offendens. Nam
in hepate obstrukciones parit, & calculos in renibus gignit, auctore Galeno.

De Rogga siue Secali. C A P. X V.

Roggæ siue Secale.



SECALE folio cum primum prodit, rubescit; inde ut reliqua frumenta viret: numerosis culmis affluit, Tritici tenuioribus, longioribus, quatuor, ut plurimum, genicula habentibus. spica in ordines & versus digesta, breuibus, non acutis, sed innocentioribus aristis cingitur, quæ cum floret, erecta est; semine vero prægnans, procumbit ac deorsum dependet. Granum oblongum, nigricans, gracile, ac nudum, quod è glumis facile concidit, ac sæpenumerò sponte exilit. radices multæ, tenues, fibrosæ.

Nascitur cum in Germania ac apud alias nationes plurimas, præsertim Septentrioni subiectas, tum in Belgio omnibus ferè agris tam sterilibus quam lætis, veluti in Brabantæ Capania, quæ hoc frumentum, licet arida ac sterilis, feliciter progignit. Qualicumque enim solo prouenit, quantumvis rigenti, gracili, aut arido, fœcudiore tamen ac lætiore melius præstantiusque.

Seritur Autumno, quod & lætius, item & Vere, æstiuum, altero gracilius, paucioribus culmis, spica breuiore ac tenuiore, granoque leuiore.

Germani Nocken / Belgæ Rogge appellant: Hispani Centeno: Itali Segala: Galli Seigle, veteris Latinæ nomenclaturæ vestigia retinentes.

Plinio Secale est, de quo lib. xviii. cap. xvi. sic scribit: Rarum dictu, esse aliquid cui profit negligenter; id autem, quod Secale & Farrago dicitur, occari tantum desiderat. Secale Taurini sub Alpibus Asiam vocant, deterrium (sed

*Plinij locus
emendatus*

verius aternum) & tantum ad arcendam famem vtile, fœcunda, sed gracili stipula, nigritia triste, sed pondere præcipuum, & tamen sic quoque ingratissimum ventri est: nascitur qualcumque solo cum centesimo grano, ipsumque pro letamine est. Quæ Plinij verba frumentum Nocken ac Rogge dictum, cum Secali conuenire satis commonistrant.

Dicitur autem id, ut Plinius tradit, etiam Farrago, verum non secus, quam Far, Hordeum, Auena, Triticumve, subinde Farragines nominantur, quando videlicet iumentorum pecudumque pabulo cedunt.

Farrago siquidem, quam Graeci γέραση appellant, generale nomen est, ad omnem viridem segetum herbam, quæ pabuli causa seratur. Seritur ea ex recrementis Farris prædensa, admixta aliquando & Vicia: eadem in Africa fit, ex Hordeo: Plinius. Atque inde Farrago, quod Far sit ferro cæsum, aut quod primum in farracea segete seri cœptum, Varrone auctore, dicitur.

Ex Hordeo Farraginem facere docet Columella: Farraginem, ait, in restibili stercoratissimo loco, & altero sulco serere conuenit. Ea fit optima cum Chanterini Hordei decem modiis iugerum obseritur, circa æquinoctium Autumnale, sed impendentibus pluviis, ut confita rigataque imbribus, celeriter prodeat, & confirmetur ante hiemis violentiam. Nam frigoribus cum alia pabula defecerint, ea bubus ceterisque pecudibus, optimè defœcta præbetur: & si depascere sèpius voles, usque in mensem Maium sufficit. Quod si etiam semen ex ea voles percipere, à Calendis Martiis pecora depellenda, & ab omni noxa defendenda est, ut sit idonea frugibus. Similis satio Auenæ, quæ Autumno sata, partim cæditur in fœnum, vel pabulum, dum adhuc viret: partim semini custoditur.

Iam & ex Tritico Farraginem fieri Plinius quoque testatur. Et in Tritici, inquit, genere, pars aliqua pabuli est, quadrupedum caussa sati: vt Farrago. Absyrtus etiam *μείλινος γέαστη*, id est, Triticeam Farraginem, equulis maxime probat: ea si non adsit, *κερδίλινος*, quam Eumelus iis refert post trimatum dari solitam. Hoc modo & Secale Farraginis genus est, quando videlicet pecudum iumentorumque per hiemem pabulum efficitur.

Recentiores Roggam Siliginem terè interpretantur: qua in re quantum hallucinentur, satis ex iis, quæ capite De Tritico scripsimus, apertum est. Nam Siligo candidius ac leuius Triticum est, ac Tritici, vt inquit Plinius, delitiae, ex qua lautissimus panis & pistrinarum opera laudatissima sunt; at Secale nigrum est, & ex eo panis ater, pauperum, non lautorum, mensis ac cibis dicatus.

In non dissimilem errorem lapsi videntur, qui Nocten cum Olyra conuenire autumant: Olyra siquidem candida est, ac utricle multis continetur; Secale vero praeter quod nigrum est, glumis nullis implicatur. Ruellij conjectura plus verisimilitudinis habet, qui Secale à Briza non longe dissidere credi scribit, atque inde putari nomen Bizi panis in Gallæ vulgus manasse. Panis siquidem ex Secali fit grauis, firmus, concoctu non facilis, qualem ex Briza fieri Galenus tradit, & hunc nigrum ex Secali panem, extrita littera *r*, *pain biz* Galli nuncupant; sic vt ab inuicem non dissidere existimari possint, nisi Secalis granum nudum foret, Brizæ vero glumis implicitum, quod haec inter se differre manifeste ostendit.

Briza. Quod vero Brizæ semen glumis implicitur, ex his videtur colligendum: tum videlicet, quod eam Typhæ persimilem Galenus scribat, quæ multiplici folliculo conditur: tum etiam quod membranosa substantiam panis ex ea factus habeat, ex ipsorum nempe folliculorum admixtione; contrà plane quam Secalinus, qui Triticeo syncomisto membranas ac furfures vel pauciores vel non plures habere comperitur.

Porrò Secale proximum inter frumenta à Tritico Triticeisq; seminibus locum habet. Panis ex eo factus, lentois atque obstruentis naturæ non nihil obtinet, difficulter concoquitur, ac ventriculo grauis est, præsertim si furfurum expers fuerit. Nam confusaneus, qui simul omnia recipit, ac ex tota farina concinnatus est, si probœ coctus beneque fermentatus fuerit, minus leitus est, non admodum èrè conficitur, citoque descendit, nondum tamen Triticeo syncomisto par, quo grauior & concoctu difficilior etiamnum est. Alimentum autem corpori solidum ac firmum præstat, nec mali succi, si ex bono frumento coctus fuerit; ex malo autem frumento & corrupto paratus, prauos & corruptos succos ingenerat, & diuturniores morbos procreat, veluti morbum Germanis Schörbe, aut Schoozupft/dictum. Admisceatur huic non raro Triticum, vt leuorem gratioremque panem efficiat, qui Secalino puro minus grauis ac lentus est, & teneritudinem suam Triticeo diutius retinet.

Secale autem vt medicamentum, Tritico in calefaciendo ac digerendo potentius est.

Panis ex hoc aut fermentum, promptius ac citius abscessus maturant & rumpunt, quam ex Tritico facta.

Farina confusanea diuturniores capitis dolores lenit, in linteo capiti circumligata.

De Hordeo. C A P. xvi.

CVLMO Hordeum est quam Triticum breuiore fragilioreque, pluribus articulis geniculato, folio in stipula latiore, scabrioreque: spica longarum, alperarum, mordaciumque aristarum valle munitur, ac in versus striata, ordinibus constat, subinde binis, alias ternis quaternisve, vt plurimum, vti Theophrastus ait, senis, sed vt Tragus, etiam octonis. Spissior autem posituque arctior est, quæ pluribus construitur. Granum tenui oblonga palea includitur: radices subsunt frequentes tenuesque.

Hordeum autem (vt Plinius inquit) frugum omnium mollissimum, atque ex omni frumento minus calamitosum, quodque celerrimè reddit fertilissimumque.

Seritur (auctore Columella) soluta siccaque terra, & vel præualida vel exili.

Nascitur passim, ac vniuersæ familiare Europæ est: cum Autumno, tum frequentius Martio, Aprili, Maioque mensibus seritur.

Græcis κεράς dicitur: Germani Gersten: Belgæ Gerste: Itali Orzo: Hispani Cenada: Galli Orge nuncupant. In huius genere, quod pluribus versibus spicatur, πλευσιχόν recentiores appellant, ac Germani Κεράς Gersten. Quod sex versuum ιξατχόν: Cantherinum hoc Columelle est. Aliud duorum versuum ιξιχόν, à Columella Galaticum, à Germanis Futter Gersten/ Kl. in G.: jen. id est, exiguum ac paruum Hordeum nominatur. Quod magnum & plenum, spicamque gerit erectam, αγλατις κεράς, ab Hippocrate vocatur, ærugini id obnoxium est: quod vero incurvatur, ιπόκεράς, ab ærugine hoc minus infestatur.

Ad Hordei genus & reducendum, inquit Ruellius, putauerim, trimestre illud Hordeum, quod

Hordeum.



Hordeum distichon.



quod Gallicè *Secourgeon* dicitur, quodd rebus ad egestatem adductis, cùm annonę premit pe- *Secourgeo.*
nuria, plebem alat, & à famis noxa vindicet. Seritur verò & in Gallia, quod mundum Hor-
deum vocant, Ruellio eodem teste : huius granum nudum est, ac sponte gluma concidit, cæ-
tera Hordeo simile : *Triticeon* ac nudum Hordeum, tale à Galeno, in lib. De aliment. fa- *Triticeo-*
cult. appellatur. *Ser.*

Ceterūm Hordeum, vt Galenus in lib. De aliment. facult. non eamdem cum Tritico fa-
cultatem habet: siquidem Triticum palam calefacit ; Hordeum verò non modò non cale-
facit, sed quoquo modo ea vtare, siue panes ex eo feceris, vim quamdam refrigerandi habere
cernitur. Dissidet præterea à Tritico succi specie, quam vtrumque ipsorum gignere consue-
uit. Siquidem Triticum crassum & lentum est: Hordeum autem tenuem, & nonnihil deter-
sorum succum in nobis gignit.

Panes Hordeacei Triticeis multò minùs alunt, qui tamen ex præstantissimo Hordeo con-
ficiuntur, minùs à Triticeis in eo superantur: qui verò ex laxo & leui, panibus furfuraceis re-
spondent. Panes autem ex Hordeo eiusmodi citissimè per aluum subducuntur, quod reli-
quis non minimum accidit, si Triticeis eos contuleris. Sunt autem non modò Triticeis, ve-
rūm etiam Olyrinis, & multò magis Typhinis, friabiliores, nihil in se lensoris, vt illi, haben-
tes. Ex quo perspicuum est, quod exiguum corpori præbent alimentum, & potissimum, si
facti ex peiori Hordeo fuerint, ex quo Hippocrates ne Ptisanam quidem fieri voluit: neque
enim dum coquitur, succum copiosum ex seipso emittit.

Laudatissimum autem Hordeum quod candidum, vbi pinsitum est, apparet, nonnihilque
densitatis ac ponderis (quantum Hordeo datum est) habet. Porro quod totum plenum est,
& circumscriptiōnē extēnam habet tensam, melius eo est, quod gracile est ac rugosum.

Hordeum primi est ordinis in exiccando & refrigerando, ait Galenus in lib. De facult.
simplic. habet etiam pauxillum abstersionis, paulò etiam plus desiccat, quām farina fabacea,
cui non insunt cortices.

Hordeum, Dioscorides inquit, abstergit, vrinam cit, inflationem parit, stomacho aduersa-
tur, cœdemata concoquit. Farina hordeacea in mulsa aqua cum Ficu decocta, inflammatio-
nes & cœdemata discutit: duritias, cum pice, resina & fimo columbarum concoquit: cum Me-
lioto

Iitulo autem & Papaueris calyce, dolores finit, qui latus excruciant: aduersus intestinorum inflationes, cum Lini semine, Fœnogræco & Ruta imposita iuuat: strumas cum pice liquida, cera, oleo, & impubis pueri vrina, ad concoctionem perducit: cum Myrto verò aut Lentisco, aut Malicorio, aut silueltribus Pyris, aut Rubo, alii profluua sistit: podagrīs inflammatio-nibus cum Cotoneis aut aceto prodest: decocta in acri aceto, modo quo *ωμηλυσις*, & calida imposta, lepris medetur.

Ωμηλυσις. Est autem *ωμηλυσις*, Pelagonio auctore, mistura æqualis Fœnigræci, seminis Lini, & fari-næ Hordeaceæ.

Cremor verò farinæ Hordei ex aqua, aut cum pice & oleo decoctus, puri mouendo est: cum aceto subactus, itidem & cum pice, contra articulorum fluxiones prodest.

Habet præterea & Hordeum multiplicem usum, nam ex eo Ptisana, Polenta, Mazæ, Maltum & Ceruisia conficiuntur, de quibus deinceps.

De Ptisana. C A P . X V I I .

PTISANA δὲ τὴν πτισανὴν dicitur, & nomen quidem commune omnium frumentorum à corticibus suis, σφήτον πτισανὴν, purgatorum esse potest, sed propriè tamen & peculiariter non aliam, quàm Hordeaceam Ptisanam significat, quæ simpliciter ac citra adiectionem πτισανὴν nuncupatur. Nam si hoc modo frumentorum aliorum quorumdam semina mun-data alicubi (quod tamen rarissimum) Ptisanæ nominentur, frumenti appellatio coniungitur. Ita Hippocrates lib. *περὶ παθῶν*, & Dioscor. *περὶ φάρμακων* cap. πτισανὴν περιτίθεται, & ex Oriza Ptisanam Plinius dixit: ad Hordeaceæ nempe Ptisanæ differentiam, propriè & simili-citer Ptisanæ nominatæ.

Est autem Ptisana hæc aliud nihil, quàm Hordei granum à membranis & corticibus suis mundatum & excorticatum. Πτισανὴ, id est, macerare, tundendoque expurgare hoc oportet, ac in Sole siccare, deinde rursus πτισανὴ, rursusq; ad solem siccare. Quod autem tenue ex eo decussum est, ipsi inspergendum; hoc enim ipsum conseruat, ut Didymus in Geoponicis.

Humeat autem & refrigerat Ptisana, eduliumque est (Hippocrates ait *περὶ στάθμης ὀξεῖαν ποσιμάτων*) in acutis morbis, reliquis omnibus frumentaceis præferendum. Nam viscositas eius leuis, continua, iucunda, lubrica, & mediocriter humida sitim minime infert, & si quid ablui eget, probè abluit: non adstringit, non male turbat, nec in ventre intumescit, cum saltem, ut decet (Galenus addit) fuerit parata: hoc est, quando in coctione quàm plurimum in-tumuerit, poste à igne lento, per multum otium in chylum fuerit redacta, acetum tunc ei ad-miscetur, cum plane intumuerit: ubi verò cocta exactè fuerit, sub edendi tempus, salem te-nuem iniicere oportet. Oleum autem si initio statim adieceris, coctioni nihil nocueris, aliud tamen nihil miscendum, nisi velis Anethia aut Porri quidpiam, idque initio statim admisce-re. hæc Galenus.

Nostro tempore raro aut numquam horum aliquod additur, sed sacharum ferè, & aqua è Rosis albis stillaritia ei admiscetur, & subinde Amygdala aliquot amara, ut palato gravior fiat: aut semen Melonum vel Cucumeris nonnihil, præfertim quando impensis refrigerandum, aut somnus ea conciliandus est. Admiseretur ei & nonnumquam Amygdalorum dulcium χύλος, siue succus, (Officinae lac Amygdalinum vocant) præfertim cum aluum li-quidiorem cohibere vtile est.

Fit item ex Ptisana potus, quem Officinae Ptisanam nominant, cum tamen nec Ptisana, nec Ptisanæ χύλος siue tremor sit, sed eius tantum tenuius decoctum, ipsius substantiæ parum aut nihil retinens, quod ferè non ex sola Ptisana, siue Hordeo mundato, sed & ex Glycyrrhi-za, & Vitis passis additis, decoquitur. Qua ratione parata potio utilis est iis qui inflammatione pulmonis, partiumque respirationi deferuentium, vel renum vesicæque exulceratione aut inflammatione laborant.

Plus alimenti (inquit Dioscorides) Ptisana ob cremorem in decoctione redditum præbet, quàm Polenta ex Hordeo facta. Contra acrimonias atque arteriæ asperitates exulcerationesque pollet.

De Polenta. C A P . X V I I I .

POLENTA Hordei frigi farina est, quàm Græci propriè αλφίτη nominant: quamquam subinde τὴν αλφίτην nomen de omni alia, præfertim rudiore farina, sed impropriè dicatur.

Pluribus hæc, Plinius ait, fit modis: Græci perfusum aqua Hordeum siccant nocte una, ac postero die frigunt, deinde molis frangunt. Sunt qui vehementius tostum, rursus exigua aqua aspergant, siccentque prius quàm molant: alij verò virentibus spicis decussum Hor-deum, recens purgant, madidumque in pila tundunt, atque in corbibus eluunt, ac siccatum Sole, rursus tundunt, & purgatum molunt.

Galenus

Galenus ex recente Hordeo mediocriter friso, laudatissimam fieri ait, atque ex has Mazas preparari; deficiente autem recente Hordeo, nonnumquam & ex aliis ipsam confici, omnemque recte factam boni esse odoris, eam vero suaevolentissimam, quæ ex optimo & recente Hordeo, quod aristam nondum habet sicciam, est confecta.

Exiguum autem corpori, ut Galenus quoque tradit, Polenta alimentum dat, & priuatis quidem ac ab omni exercitatione abstinentibus satis multum; iis vero qui quoquo modo exercentur, minus quam satis est.

Deficcat vero multò magis, quam Hordeum: alium etiam (Dioscorides ait) cohibet, & inflammationes mitigat.

De Maza. C A P. XIX.

MAZA ex Polenta humido aliquo permixta & subacta conficitur. Et aliqua quidem cum sola aqua subigitur, alia vero aut cum vino, aut cum oleo, aut cum melle, aut cum aliquot horum permixtis.

Cum aqua autem eam subigi, præter quod ex libro Hippocratis De diæta secundo satis cuidens sit, testis quoque est Xenophon sexto παιδείας Cyri, vbi hic concione conuocata, milites suos ad aquæ potionem adhortatur, & à consuetis non admodum recessueros ostendit. Καὶ ἦσαν φυσικοὶ αἱρετοῦσι τὸ διάτημα μεταγένετον τοῦ πατέρος τοῦ αἵρετος αὐτοῖς. id est: Etenim qui Polenta victat, Mazam aqua permixtam edit; & qui pane vtitur, panem aqua subactum.

Subigi vero Mazam, & cum viño, ex Hippocratis libro de internis affectionibus apparet, vbi in hepatico morbo, cui suffocatio accedit, & similiter in coxendicum dolore, eam, quæ vino dulci subacta est, non redendum consulit.

Idem Mazam oleo & melle quam maximè subactam, in typho quodam eodem libro exhibendam præcipit.

Hesychius vero πατέρος interpretatur, Polentam aqua & oleo permixtam.

Et à principio, Athenæus ait, popularem cibum ex Alphitis, Mazam veteres vocarunt, ipsamque præparare πατέρες dicebant, posteà vero necessarium victum, ob intemperantiam varietate distinguentes, studioseque paulatim immutantes, nomen ipsum Mazæ in πατέρες commutarunt, ita appellantes omnem cibum magnificum; πατέρων vero iplos cibos præparare dixerunt. Atque inde fortasse, quæ ex Amygdalis & faccharo placentæ conficiuntur, in Officinis Massapanes, hac artate adhuc nominantur.

Porrò Maza, ut Galenus ait, panibus Hordeaceis ægrius concoquitur, magisque ventriculum flatu implet, in quo etiam si diutius manserit, turbationem excitat. Citius autem subducitur, si commixta diutius fuerit ac subacta. Quod si mel quoque addatur, citius etiam ob id, ventrem ad excretionem incitat.

De Crimno. C A P. XX.

CRIMNO, inquit Galenus in Commentariis libri secundi prædictionum Hippocratis, crassior Polentæ pars appellatur, quæ grandiuscula effracto inuehitur Hordeo, refugiens videlicet molæ exactiorem contractionem. Dioscorides, quem Galenus etiam lib. De facultat. simplic. sequitur, non Polentæ modò, sed & Tritici, Zeæ, ac Olyræ, siue ante tostorum, siue non tostorum crassiorem farinam κειμενον appellat, Crimni nomen ad rudiorem crassioremque farinam cuiusvis frumenti transferens.

Solo molæ discrimine ac trituræ modo à farina siue ἀλεύρῳ differt. Αἴσιος enim dicitur Αἴσιος, quando granum in tenuissimas partes quam exactissime contritum est; κειμενον vero rudior farina, quæ fragmenta maiuscula ipsorum granorum continet.

Πόλει, id est, pultem ex eo faciunt, inquit Dioscorides, quæ abundè alit, facile conficitur, & alium vehementius astringit, si Zea ex qua fit, priùs torreatur.

De Malto siue Byne. C A P. XXI.

MALTVM à recentioribus nuncupatum, ex Hordeo quoque fit. Nam ipsum Hordei granum est, primùm donec intumuerit aqua maceratum, quod deinde germen emittit, ac postremò cum ipsis germinibus siue enatis ligulis reliccatum est.

Resiccatur autem frequentissime ignis calore, quam ad hoc constructus fornax per exigua spiramenta admittit: raro vero absque ignis subsidio, idque non nisi æstiuis mensibus vigente æstu, cum in tabulato, eminentiore loco perflato, tenuiter sparsum, læpius per diem vertitur.

Nostrī Mout, Germani Matis/ recentiores Maltum voce à Germanis mutuata appellant. Aëtius Græcus medicus, Hordeum hoc modo præparatum εύρεται nominat.

Ad Beræ siue Ceruiliæ decoctionem conficitur, & laudatissimum quidem Martio & Aprili mensibus.

Burn. Quali-

Qualitatem habet siccum quidem Hordei intensiore, frigidam vero multo remissiorum; præsertim quod ignis calore tostum ac reficatum est. nam *επιτίσθυμα*, quod illi ab affectione diutinaque tostione inhæret, siccitatem eius intendit, ac frigidam non solum remittit, sed & qualitatem quamdam calidam ei imprimat. Quod vero æstius caloribus reficatum, minus quidem calet, tamen & ipsum Hordeo calidius vel sola germinatione redditum, quæ absque leui quadam putrefactione, ob alienam humiditatem, non succedit. Putrefactione autem caliditatem multis accedere, satis notum.

Galenus lib. De aliment. facult. Hordeum ait, quoquo modo quis eo utatur, siue pisanam coixerit, siue polentam fecerit, vim quamdam refrigerantem retinere, verum id de Malto non videtur intelligendum, quod vel germinatione sola, deinde & tostione, si accesserit, magis à natura sua recessit, quam polenta, quæ vel ex crudo nondumque maturo Hordeo, vel in aqua macerato tantum, ut diximus, conficitur.

Abstergit præterea & Maltum Hordeo potentius, minus lento habet, cum, quia farinæ minus, siliquarum vero plus habeat, quam crudum Hordeum, tum ab inhærente illi non nullo calore; partim à leui illa corruptione, partim ab empyreumate, qui abstersionem coniunctam habet. Ventris tormentibus aliisque similibus ex frigida causa doloribus Maltum subuenit, tostum feriensque in sacculo appositum.

Cataplasma ex Bynes farina tumoribus hydropticorum utile, Aëtio teste, imponitur.

De Bera siue Ceruisia. CAP. XXII.

BERA ex Malto & Lupuli salicarij conis modo proportioneque certis, aquæ dulci permixta, coquitur: & simplicissima quidem ac propriissima talis est. Proxima, quæ Triticum, Zeam, alijsve fruges, vna cum Malto Hordeaceo admittit. Quæ vero præter fruges, herbas, semina, flores, aromata, aut alia huiusmodi caput implentia, ac ebrietatem inducentia, à frugum natura aliena, permixta habent, compositæ quædam Beræ, siue Ceruisia sunt ac medicatæ, ab Hordeacea Triticeave Beræ & sapore & qualitate dissidentes.

Nominant autem huiusmodi ex frugibus potum cum Germani omnes, tum Britanni reliquæq; Septentrioni subiacentes gentes, communis quidem ac patria voce, Birr siue Bere/ Latina autem passim Ceruisiæ. Veteres vero ex Hordeo potum variis nominibus appellabant: & οἶνος quidem ζεῦσθωρ, id est, Vinum hordeaceum, omnem ex Hordeo compositum Græci. Eudem Aristoteles, Athenæo teste, πύρον dixit: alij βρύτον, veluti Sophocles in Triptolemo, & Hecatæus in Europæ periodo, ubi Paonas βρύτον ait bibere ex Hordeo; οὐδέ τιλον vero ex Milio & Conyza. Hellanicus tamen non solum ex Hordeo, sed & ex radicibus fieri ερύτον afferit: Bibunt, inquit, ex radicibus βρύτον, veluti Thracæ ex Hordeo.

Zethij. *Ægyptij* Hordeaceam potionem ζύθον siue ζύθον, Theophrastus ait, appellant. Idem testatur Plinius lib. xxii. Ex frugibus, inquit, potus, Zythum in Ægypto, Celia & Ceria, in Hispania, Ceruisia & plura genera in Gallia, aliisque prouinciis. Quos lib. xiiii. nominibus quidem aliis, sed ratione eadem confici tradit.

Diodorus Siculus, Zythum non in Ægypto solum, sed & in Galatia quoque fieri affirmat. Tanta est (inquit, de Galatia scribens) aeris frigiditas, ut neque vinum ea regio, neque oleum producat, quare coacti homines potum sibi ex Hordeo componunt, quæ appellant Zythum. Dioscorides unum Hordeacei potus genus Zythum, alterum Curmi nominat.

Simeon Zethij ex posterioris ætatis Græcis, huiusmodi potionem Arabico nomine φέγγον vocat, alij φοκαστον, siue φυκαστον: Arabibus tamen, Phoucas non ex Hordeo tantum potus est, sed etiam, veluti Rhafis scriptum reliquit, ex pane Heueri, hoc est, Similagineo, Mentha, ac Apio compositus: ac, ut Hali Abbasteatur, quædam etiam Phoucas ex pigmentis, aut ex Malorum punicorum succo conficitur.

Hæc autem omnia siue similia sunt genera diuersis appellata nominibus, siue proprietate aliqua discrepantia, cum Bera siue Ceruisia nostra in eo conuenire possunt, quod ex Hordeo ac frugibus componantur, præparationis tamen modo, vel alia qualitate aliqua ab ea fortasse differunt. Nam si Zythum, ut Galenus ait, lib. De facultat. simplic. medicament. ex putredine proueniat, aut ex frugibus fiat aqua madefactis, donec resoluantur in liquorem Vino similem, veluti Hermolaus Barbarus in Corollariis scribit: ac acre maliq; succi sit, renes & neruos tentet, quæ à Dioscoride ac Galeno quoque ei attribuuntur, cum Bera siue Ceruisia nostra nequaquam conuenire potest. Nam Bera ex fruge non fit putrefcente, multo minus ex ea in liquorem resoluta, sed ex hordeaceo Malto, ut diximus, coquitur, ab omni putredine asseruato. Est & Bera per se suavis, dulcis, ac boni omnino succi. Quæ certè Beram à Zytho, cum conficiendi modo, tum facultate dispidere ostendunt. Sin autem Zythum non eo, quo Galenus aut Hermolaus tradunt, conficitur modo, sed ex Hordeo ac Tritico fiat leui-

ter

ter tantum putrefactis, ac à natura sua commutatis, vt Theophrastus scribit, Zythum & Beria simillima sunt. Nam Hordeum in Maltum traniens, leuiter quodammodo computrescit & à natura sua recedit. Verum tunc Galenius, Dioscorides, & qui deinceps eorum sententiam ac doctrinam inseparati sunt, minus recte Zythi facultates cognouisse videbuntur. Propter leuem hanc etenim putrefactionem siue mutationem, Hordeum, aut ex eo potus, mali succi statim fieri non potest, non minus quam Polenta, quae ex non recente Hordeo, sed ex maturo & sicco in aqua macerato conficitur. Siquidem & tunc leuiter quodammodo Hordeum computrescit, humoremq; alienum imbibit, veluti dum Maltum futurum est. Polentam tamen hanc ob causam neque Galenus ipse, neque veterum quisquam, mali succi fore asseruit, sed contrà omnem boni odoris, suaveolentemque esse, sicuti & Maltum rite confectionum est.

Zythum autem, siue ζύθος, ex Hordeo & Tritico confici leuiter putrefactis, Theophrastus lib. De causis sexto, vbi de saporibus agit, his verbis tradidit: Nonnullos verò, ait, naturam commutantes & leuiter putrefacientes, in succos cogimus, ad bibendum idoneos, veluti qui vinum ex Hordeo ac Tritico conficiunt, quod in Aegypto ζύθος appellatur.

Ceterum ut ad temperiem Beræ veniamus, pendet ea ex qualitatibus eorum, ex quibus componitur. At materies eius, vt diximus, sunt aqua, Maltum Hordeaceum, subinde Triticum aut Zea, & Lupuli salicarij coni. Aqua quidem simplex, cuiusmodi ad Beræ decoctionem sumitur, frigida est & humida: Maltum cum exigua caliditate resiccatur & abstergit: Triticum ac Zea temperate calida seccaque sunt: Lupuli coni secundo ordine calefaciunt rescantque, caput tentant, vrinas mouent, abstergendi quoque ac aperiendi potētia prædicti. Faciunt hi ad Beræ cū saporem, tum diuturnitatē, fruges verò alimenti materialm subministrant.

Ex horum autem varia & inæquali mistura, diuersa Berarum genera, dissimilibus qualitatibus prædicta, sunt. Tenues quædam, potentes aliae, rubicundæ siue nigræ hæ, candidæ illæ, amaræ pleræque, dulciores nonnullæ. Quæ frugum plurimum admiserunt, potentiores sunt: quæ minus tenuiores, minimum tenuissimæ. Ex Hordeaceo Malto, diutius tosto, rubicundæ, & præsertim, si diuturnior decoctione accesserit: præcipua autem parte ex Zea ac Tritico confectione candidæ sunt, senescentesque tenue & aquosum vinum substantiæ tenuitate quodammodo referunt: amariores caputque citius tentantes, Lupuli coni copiosius incocti efficiunt; dulciores corum parsimonia, fruges enim ex se dulcedinem conferunt.

Inter has tenuissima, frigida quidem est & humida, superante in ea aquæ qualitate ac substantia, non tamen alicuius caliditatis expers.

Potentiores caloris plus habent, cuius etiā vi atq; potentia, in vasa conditæ non secūs ac mustū fluctuat ac effervescit, minus tamē quā mediocre vinū calide, à quo non solū téperamenti caliditate, sed & tenuitate substantiæ superatur. Calefactio siquidē Beræ clemēs mitisq; est.

Alimentum autem præstant illæ quidem exiguum, aut nullum, hæ verò copiosius, copiofissimum potentiores: omnes probi succi, si ex bonis frugibus & bene decoctæ fuerint. Crassiores circa præcordia aliquantis per hærent, tardeque descendunt: candidæ, tenuiores & citius digeruntur: amaræ, abstergione aluum leniunt: mediæ, medio se modo habent.

Compositæ Beræ, quæ videlicet præter fruges ac Lupulum, & alias quasdam herbas, vel flores, semina, fructus, aromata, similiave recipiunt, pro qualitate eorum quæ admiscentur, varias qualitates ac facultates obtinent, subinde etiam noxias.

Recens Bera quæ nondum subsedit, non secūs ac mustum, virtus complura gignit: inflatōne parit, aluum conturbat, calculum procreat, ac vrinæ sæpenumerò stolidum excitat: foris tamen admota, neruosarum partium dolores sopit, si dulci calenteque ea foueantur: præstat ad hoc recentissima, & cui nondum Lupulus incoctus est, ac inter omnes potentior.

Acida neruos & renes tentat, ventriculum conturbat, ac vitiosum in corpore succū gignit.

Acetum quod ex Bera conficitur, Vini aceto minus acre, minusque potens est, nec partium adeò tenuium.

De Milio. Cap. XXIII.

MILIVM multiplici fruticat culmo, geniculato: folia habet ampla, arundinacea: summo caule, non spicam sed effusam promit iubā, siue φόλεω, deorsum reflexam, flavi ut plurimum coloris, subinde nigrantem, in qua sémē gignitur parvū, durum, splendensque, paucis tenuibus tunicis conuetitū, à quibus facilime excidit: radice nititur numerosa, altaque.

Leuem solutamque humum desiderat, nec in fabuloso solū, sed & in arenoso quoque prouenit, modò vel humido cælo, vel riguo solo: nam siccum cretosumque reformidat, Columella ait. Milio Plinius Campaniam præcipue gaudere tradit: ante Ver commodè seri non potest; teporibus maximè lœtatur.

Milium, Theophrastus ait, siccitatæ sua diuturnum esse, plus centum annis seruari posse, si quod ventus & aër non perueniunt, vt auctor quoque est Varro, condatur.

Milium.



Lacryma Iobi.



Græcis οὐρανός, nonnullis κεράτης dicitur, Hippocrati Patpale, vt Hermolaus ait: Hispanis *Mijo*, Mill: Italos *Miglio*: Germanis *Hirse*: Gallis *Millet*: nostris *Hirs* & *Milie*.

Mili grana ac paleæ, vt Hippocrates ait, siccant & ventrem fistunt, & cum sicubus, fortibus doloribus conferunt. Ipsum autem Milium coctum alit, non tamen alio fecedit.

Primo ordine, Galenus ait, refrigerat, exsiccat verò tertio, aut certè secundo intenso, paululum etiam habet tenuitatis.

Panis qui ex Milio fit, exigui est alimenti, frigidus, præaridus, & friabilis, nihil enim in se habet neque lensoris, neque pinguedinis: iure ergo aluum humentem deticcat, veluti & Panicum, quo tamen ad omnia est præstantius, suauiusque editur, facilius concoquitur, ventrem minus fistit, magis nutrit: foris impositum in fæculis, idoneum est fomentum iis, quæ citramorsum exsiccari postulant.

Torretur, auctore Dioscoride, ferenſque in sacco ponitur, vt torminib[us] reliquiasque doloribus, si foueatur, auxilio sit: neque aliud, teite Plinio, utilius, quoniam leuissimum molissimumq[ue] est, & calor[is] capacissimum. Itaque talis usus eius est, ad omnia quibus calor profuturus est.

Farina eius cum pice liquida, serpentum & multipedæ plagiis imponitur.

De Lacryma Iobi. C A P . x x i i i .

MI L I I generi ascribitur & quam Lacrymam Iobi recentiores nominant, arundinaceæ quoque naturæ φυγ: folia habet longa, lata, & arundinacea; culmos crassos, geniculatos, ex quorum superioribus geniculis duo, tres, aut plures exeunt pediculi, & in singulis semina singula, dura, quali rotunda, Ochris maiora, à quibus dependent quædam veluti spicæ inanes, & muticæ: radices in fibras multas diuiduntur.

In hortis Italiæ, Galliæ, ac subinde etiam Belgij seritur; peregrinum siquidem eit, & aliunde illatum.

Nonnulli Lithospermi speciē faciunt, propter seminis duritiem, toto tamen genere à Dioscoridis Lithospermo differt. Itali *Lacrymam Iobi* appellant: posset fortasse non inepte *Arundo Lithospermum* nuncupari, vt Gesnerus ait.

Usum habet nullum, nisi quod mulierculæ, seminibus istis lycio siue filo transmisso pro sphærulis precatoriis subinde utantur, catenulas inde facientes.

De Panico. C A P . x x v .

PA N I C V M Milij similitudine culmis prodit complurimis, intus farctis, multis articulis geniculatis, ac sensim extenuatis: folia ei arundinacea sunt, multò quām *Triticum latior*: spicæ siue paniculam fert oblongā, crassam, prædensam, ex multis coaceruatam & compactā granis rotundis, duris, splendentibus, folliculis quibusdam

Panicum.



Panicum Indicum.



De Panicō Indico.

dam intectis, colore subluteis, Milio similibus, sed minoribus: radice nititur fibrosa & valida.

Seritur simili, quo Milium, solo: calidis & fiscis regionibus libentiū nascitur: ex vernalium frugum numero est, quæ temporibus gaudent: nimia aquatione folium dimittit, vti & Milium: sed validius, ait Theophrastus, Milium, dulcius Panicum ac infirmius: consummatur celerimè, & reseruari egregiè potest.

Græcis ἑλυμός dicitur; nonnullis μελίνη, aut μέλινος. Diocles medicus Mel frugum appellauit. Germani Heydeipennig, aut Pfennig: Hispanis Panizo: Galli Panic; Latini à panicula, nomen Panico dedere. Ruellius Panicum ab Italís Melicam nuncupari refert; Matthiolus autem Melicam Sorghum nominat.


Errādi occasiōne præbuuisse videtur Ruellio, nonnis Melicæ cum μελίνη, sive μελίνη, vicinitas, quæ fecit ut Panicū & Sorghū inter se cōfuderit, & Melicę descriptionem cum Panici miscuerit.

Panicum autem facultate pauci nutrimenti est, & exsiccatoria, auctore Galeno: fistit quoque ventris fluxus ceu Milium, in lacte caprino decoctum (addit Plinius) & bis die haustum. si verò foris illinatur, exsiccat atque refrigerat.

Panis, qui ex Panico fit, vt & is qui ex Milio, exigui est alimenti, frigidus, præaridus, friabilis, nihil in se habens neque lentoris, neque pinguedinis; quare & aluum humentem desiccat.

C A P. XXVI.

Panici Indici spica.



v 2

PRÆTER


PRÆTER superius Panicum & aliud quoddam peregrinum ostenditur, quod Indicum cognominatur. Culmos istud promit crassos, viii. aut ix. pedes altos, crebris geniculis articulatos: folia verò è singulis geniculis dura, magna, longa, lataque, omnino arundinaceae: spicæ siue verius paniculae crassæ sunt, & dense compactæ, aliquantulum hirsutæ, breuiores non raro quam vulgatis Panici, sed crassiores: exent hæ & è summo culmorum, & è foliorum sinibus, breuioribus ac tenuioribus veluti culmis insidentes: semen oblongum capillaceis glumis implicatum, quæ ipsas paniculas hirsutas efficiunt: radices validæ sunt ac fibrosæ, ampliores quam prioris Panici.

Sub finem aestatis, etiam si calida feruent que fuerit, maturitatem semen in Belgio vix consequitur: in calidioribus regionibus melius proficit.

Panici speciem esse, ipsa dense compacta panicula ostendit.

De Melica siue Sorgho. C A P. XXVII.

Melica siue Sorghum.



Plinius locis amedatus. Etum, nigrum colore, amplum grano, arundineum culmo, adolefecit ad pedes altitudine septem; prægrandibus comis, phobas (exemplaria perperam culmis lobas, habent) vocant, omnium frugum fertilissimum, ut Plinius tradit.

Melicæ autem huic & similis alia quædam Melica candida reperitur, quæ arundinaceis foliis, præaltis & geniculatis culmis, effusa iuba Sorghum quoque refert, sed semen eius rotundius & candidum est.

Bellonius hanc Melicæ speciem in Cilicia ac Epiro serit, & illic à se repartam scribit: ibique panes ex ea coqui.

Ab Arabibus Hareoman, eodem teste, appellatur. Apud Auicennam tamen cap. CCCXXXI. Areoman non Melica, sed Zea est, si interpreti fides.

Ceterum Melicæ utriusque semen Panico sapore & temperamento simile est: cogitur subinde à rusticis in panes, sed friables, & parum alimenti subministrantes: frequentius, & ut plurimum, gallinacei generis ac columbarum saginæ seruit.

De Oriza, ex Theophrasto & aliis. C A P. XXVIII.

ORIZA Lolio aspectu similis est, ut Theophrastus refert: non spicam, sed veluti iubam effundit Milij aut Panici modo: folia ei, Plinius ait, carnosæ, ac Porro similia, sed latiora:

Oryza.



Frumentum Turcicum.



tiora: flos purpureus: radix gemmeæ rotunditatis.

Aristobulus apud Strabonem, Oryzam tradit in aquis conclusam stare, areolis quibusdam factis: eamque esse altitudine cubitorum quatuor: multiplicem spicam habere: copiosumque fructum adferre, meti circa Pleiadum occasum, atque ut Zeam repurgari: nasci in Bactriano agro, & in Babylonio, & in Susio; & in inferiore Syria.

Hac autem ætate non in iis solum regionibus, sed & in aliis plurimis prouinciis, veluti in Fortunatis insulis & Hispania prouenit: vnde in Belgiam, pista ac ptisanæ modo repurgata adfertur. Nascitur palustribus ac riguis.

Vere seritur, & in India quidem, auctore Eratosthenè, cum altius imbribus madet.

Graci ὄρυζα, aut ut Theophrastus, ὄρυζον appellant: Latini Graciam vocem retinent: Galli Riz: Germani Riz: & Reis: nominant.

Semine hoc, inquit, Galenus, omnes in sitten-
da aluo vtuntur, ipsum eodem modo, quo Chondrum coquentes: difficilius tamen quam Chondrus conficitur, & minus alit. Belgæ Oryzam cum lacte coquunt, edulium parantes, quod mediocriter cum aluum adstringit, tum nutrit.

De frumento Turcico, sive Maizo.

CAP. XXIX.

TURCICO frumento culmus est arundi-
naceus, solidus, fungosa medulla refertus,
multis articulis geniculatus, quinum senumve
pedum proceritate, inferiore parte crassus, ac
subinde purpureus, superiore paulatim exten-
nuatus: folia lata, longa, venosa, arundinacea:
spicæ summo caule dodrantales, iubæ ferè mo-
do multiplices, muticæ, procumbentes, vacuæ,
nullum femen gignentes, instar tamen Secalis
florescentes, flore aut candido, aut luteo, aut
purpureo, prout videlicet fructus coloratus erit.
Fructum terunt prægrandes veluti spicæ, quæ
ex culmi geniculis, atque ab uno culmo tres
quatuorve, alterno exeunt ordine, multis folia-
ceis ac membranosis tunicis, veluti vagina qua-
dam obuolutæ, è qua longi tenuesque capilli
prominent, singuli singulis granis adhaerentes.
Semina magna sunt, Eruiliae magnitudine, qua
media stino haerent angulosa, superficie verd
rotunda: colore alias candida, alias lutea, pur-
purea aut rubra, sapore dulcia ac suauia: quæ in
ordinis ac versus octo aut decem digesta arctissimè coniuncta, nascuntur: radicibus nititur
hoc frumentum multis fibrosis ac firmis.

Seritur in hortis, idque Martio aut Aprili:
fructus Autumno maturescit.

Haudquaquam ex Asia quæ Turcorum Im-
peratori paret, (ut à plerisque & vulgo creditum
est) aut ex Oriente, sed ab Occidente & ex
America, vicinisque insulis, in Hispaniam pri-
mum, deinde in alias Europæ prouincias inue-
ctum.

SIO R. DODONAEI STIRPIVM HISTORIAE

Etum est. vbi & seritur, & ex eo panis conficitur, ac subinde procerius multò adolescit.

Bactri-
num Trisi-
cum.

Germani Eurefsh Korn: Belgæ Torex Koren: vulgò Frumentum Turicum: Galli Blé de Turquie appellant: Americæ ac vicinarum insularum habitatores Maizium & Maizum nominant: Valerius Cordus Triticum nuncupat Bactrianum, sed ratione aut occasione non optima: nec enim cum Tritico nostro similitudinem habet: neque cum eo quoque frumento, quod in Asiae quodam loco ultra Bactra nasci proditur. Nam hoc Theophrastus quidem adeò grande fieri, narrari refert, ut grana singula magnitudine nucleos Oliuæ æquiparent. Quod & Plinius lib. xvii. cap. vii. scribit: Tradunt, inquit, in Bactris grana tantæ magnitudinis fieri, ut singula spicas nostras æquent. In quibus verbis, pro dictione, spicas, fortassis rectius legeretur, Oliuas, ut apud Theophrastum, ex quo hæc transcripta.

Plinij locus
sufficiens.

Bactriponos.

Extat etiam apud Strabonem lib. xv. Bosmori mentio, qui Eratosthene teste, in Bactriano quoque ac Babylonio agro, iisdem quibus Oriza locis nascitur. Est hoc frumenti genus, quod in veneratione esse Onocritus tradit, Tritico minus: inter amnes prouenit, excussumque areis protinus torretur. Iureiurando etenim adiunguntur messores, non asportatueros se inde, priusquam coixerint, ne semen in alias terras exportari possit. Huic Bosmoro frumentum istud etiam parùm simile, cum semen eius Triticeo dissimile & maius sit.

Quam ob causam, cum duo hæc apud veteres solum reperiantur, quæ Bactriani Tritici nomine appellari posse videntur, atque his ipsis frumentum Turicum dissimile sit: non Triticum Bactrianum, sed novo Tritici Turcici, aut Maizij nomine potius nuncupandum, donec vetus eius nomen Oedipus aliquis demonstrarit, qui à veteribus alicubi descriptum, aut cognitum fuisse, persuadere queat.

Ceterum in nutriendo frumentum istud Turicum, Triticeis omnibus, ipsisque non solum Secali, sed & Hordeo longè est inferius. Panis ex eo apparatus mediocriter quidem candidus est, absque furfuribus concinnatus, sed durus ac siccus, veluti biscoctus, nihilque lentoris, aut omnino exiguum habens. Concoctu eas ob caussas difficilis, corporique nullum aut omnino exiguum alimentum præbens: tardè descendens, ac aluum constringens, veluti ex Milio aut Panico factus.

De Phalaride. C A P. xxx.

Phalaris.



des locustæ dependent, in quibus semen oblongū superiore parte, exiguis capillis hirsutum, ac glu-

PHALARIS culmos tres, aut quatuor promit, cubitales, geniculatos, Zeæ aut Tritici culmis minores: folia item similia, sed minora quoque, spicas breues turbinatas, exiguis squamis candidantibus compactas, e quibus flores candiduli, a breuibus staminibus dependent: semen deinde inter eas gignitur, splendidum candidumque, uti Mihum, maius, oblongum, Lini semini forma ac magnitudine, aut, ut Plinius ait, Sesamea simile.

Peregrinum hoc semen Belgio est; infertur autem ex Hispania ac Fortunatis insulis.

Seritur Vere, sub finem aestatis hic matutinascit.


Græcis pariter ac Latinis φαλαρίς dicitur: Galeno φαληρίς: nostri Canarie saet, hoc est, Canariense semen appellant, à Fortunatis nimis insulis, quarum una Ptolemæo Canaria nominatur.

Succus & semen ad vesicæ cruciatus utiliter bibi, Galenus ait, creduntur. Pharmacopœi plerique, deficiente Milio, eo in fomentis non infeliciter subinde vtuntur. In siccis siquidem fomentis Milij usum habet, ac eius succedaneum est.

De Auena. C A P. xxxi.

CVLMO geniculato, folioque Triticum ac Zeam Auena imitatur: in cacumine veluti iubam emittit, ex qua paruulae veluti bipedes locustæ dependent, in quibus semen oblongū superiore parte, exiguis capillis hirsutum, ac glu-

Auena.



Auena nuda.



ac glumis inuolutum, conditur: radicibus nititur copiosis, à quibusdam plurimis dispargitur culmis.

Loca amat rigua: Vere sata, sub finem aestatis maturescit.

A Græcis βερβέρης dicitur: Germanis Habern: Brabantis Hauere: Gallis Auoine.

Est verò & βρῶμος cognomento πόνι, ex frugum vitiis, de qua infrā.

Iam & Auena quedam est, cuius semen nudum nullis glumis implicatur, aliàs vulgari *Auena nuda*.
Auenæ per omnia similis: nudam Auenam quis nuncupauerit.

Auena autem, vt Galenus ait, iumentorum est alimentum, non hominum; nisi vtique aliquando extrema fame, ad panes ex ea conficiendos compellantur. Panis qui ex ea fit, est insuavis, non tamen aluum aut fistit aut proritat; sed, quod ad illud saltem pertinet, medium locum obtinet.

Vt medicamentum verò similem Hordeo vim habet: nam cataplasmati modo imposita desiccatur, & mediocriter ac sine morsu digerit: temperie autem habet paulò frigidorem, non nihil etiam astrictionis obtinet, vt ad ventris profluvia iuuet.

Pulte huius, Dioscoride auctore, aluus fistitur, & prodest eius in sorbitione tussientibus succus.

Auenæ farinam in aceto coctam tollere nœuos, Plinius præterea tradit.

De Fegopyro. C A P. XXXII.

In frumentaceorum numero Fegopyrum quoque esse videtur; subinde enim cogente necessitate, panis ex eo, aut cum eo conficitur: habet id culmos rotundos, laeves, striatos, rubicundos, in plures alas diuisos: folia Hederæ molliora minoraque, Semydæ proxima: flores paruos, candidos, racemosos: semina folido colore nigricantia, triangularia, Smilacis nigræ (Malacocissum veteres nominant) similia, sed paululum maiora: radicibus nititur paruis ac fibrosis.

Nascitur qualicumque solo, neque vllum, quantumvis aridum, macrumque respuit: gaudet imbribus, citò prouenit, celeriter maturescit.

Seritur Martio aut Aprili; ac non rarò Autumno, pabuli caufsa. Plerisque Germaniæ

v. 4 locis

Fegopyron.



locis & Brabantiae Campaniae vulgare; Italiae etiam non incognitum.

Tridentina rura *Formentone*: Foro Iuliensis *Saracino*, ut testis Matthiolus, nominant: Germani superiores *Heydenforn* / inferiores *Werla* wepdt/aut *Wueclienwepdt*/que hirci aut *Fagi Triticum* sonant: Graecè *Φαγόπυρον* aut *Φαγότριτον*, Latinè *Fagotriticum* dixeris à seminis figura, quod *Faginam glandem*, forma triquetra & colore sordido, quodammodo refert, licet quantitate multò minus.

Apud veteres nullum nomen habet: nam *Ocymum* quidem non est, siue illud *Dioscoridis*, siue alterum *Varronis* & *Columellæ*. *Ocymum* siquidem *Dioscoridis*, aut ut plerique *Ozymon*, herba est odorata, quam nostra ætas *Basilicum* nominat.

At *Varronis* ac aliorum rei rusticæ *Latinorum* scriptorum *Ocymum*, non alicuius herbae genus, sed *pabuli* nomen est, ex segetibus vide- licet, ac leguminibus, veluti *Varro* libro 11. c. xxxii. de *Ocymo* scribens, testatur: Id genus *pabuli* sunt, inquit, segetes virides sectæ antequam siliquas ferant. Item & *Plinius* li. xviii. cap. xvi. Apud antiquos, ait, erat *pabuli* genus, quod *Cato* *Ocymum* vocat, quo ciebant (exemplaria pleraque minus bene, filtebant, ha- bant) aluum bubus, id erat è *pabulis*, segete viridi dissecta antequam gelaret. *Sura Manilius* id aliter interpretatur, & tradit *Faba* modios

decem, *Viciae* duos, tantumdem & *Eruiliae* in iugero Autumno misceri & seri solitos, melius & *Auena* Graeca, cui non cadit semen admixta: hoc vocatum *Ocymum*, boumque caussa seri solitus, *Varro* appellatum à celeritate proueniendi ait.

Ex quibus sanè euidentissimum est, *Fegopyron* propriè *Ocymum* non esse; sed frugem nouam, veteribus vel non cognitam, vel non visitatam, vel neglectam.

Ceterum *Fegopyron* *Tritico* quidem, *Secali* ac *Hordeo* minus nutrit, plus tamen quam *Milium* aut *Panicum*.

Pulmentaria ac *placentæ* quæ ex eius farina conficiuntur, facile concoquuntur, citò de- scendunt, alimentumque corpori adferunt, exiguum quidem non tamen malum aut vi- tiosum.

Panis qui ex eo aliquando, cogente annonæ penuria, coquitur, aut farinam eius admixtam habet, humidus est, citiusque descendit, ac flatulenti plus obtinet, quam ex *Secali* coctus.

Herbam viridem priusquam semen maturuerit, boues iumentaque pascuntur. Semine gallinaceum genus pastum citissime pingue scit.

STIR-